

# ՀԱՅ-ՀԱՐԱԻՍԼԱԻԱԿԱՆ ԱՌՆՉՈՒԹԻՒՆՆԵՐԻ ՊԱՏՄՈՒԹԻՒՆԻՑ (ՍԿԶԲԻՑ ՄԻՆՉԵԻ 1930ԱԿԱՆՆԵՐ)

ԱՐԾՈՒԻ ԲԱԽՉԻՆԵԱՆ  
artsvi@yahoo.com

Բալկանեան թերակղզու երկրներից (Բուլղարիա, Ռումինիա, նախկին Հարաւսլաւիայի երկրներ, Ալբանիա, Յունաստան) ամէնից քիչ հայկական ներկայութիւն ունեցել են հարաւսլաւական երկրները (աւելի պակաս չափով՝ Ալբանիան): Հարաւսլաւիա (արեւմտահայերէնում ընդունուած է նաեւ Եուգոսլաւիա/Եուկոսլաւիա ձեւը) ասելով նկատի ունենք նախկին Հարաւսլաւիայի Սոցիալիստական Հանրապետութիւնը կազմող երկրները՝ Սերբիա-Չեռնոգորիան (Մոնտէնեգրո<sup>1</sup>), Հորվատիան, Բոսնիա-Հերցեգովինան, Սլովենիան եւ Մակեդոնիան:

Հակառակ իրենց սակաւաթիւ ներկայութեանը, միջնադարից սկսած ալ հայերի ունեցած այլեւայլ շփումները ուրոյն հետաքրքրութիւն են ներկայացնում՝ որպէս հայ գաղթականութեան եւ Եւրոպայի այդ տարածաշրջանի ժողովուրդների հետ առնչութիւնների պատմութեան դրսեւորումներից մէկը: Յատկապէս Սերբիայի պատմութեան հետ հայերի ճակատագրի նմանութիւնը առիթ է տուել երկու ժողովուրդների միջեւ գուգահեռների անցկացման<sup>2</sup>: Հայ ժողովուրդը մշտապէս հետաքրքրուել է իր պէս օսմանեան լծի տակ գտնուող եւ ազատագրական պայքար մղող սերբ ժողովրդով<sup>3</sup>:

Հարաւսլաւիայի հայերի պատմութեամբ զբաղուել են հատուկենտ ուսումնասիրողներ, սակայն ցայժմ չկայ առկայ փաստերն արտացոլող մի համապարփակ ուսումնասիրութիւն: Թեման յատկապէս հետազօտել է որոշ ժամանակ Սկոպիէում բնակուած բանասէր Յակոբ-Գրիգորը (Ճրրճրբեան, 1905-1985), որ 1930ականների սփիւռքահայ մամուլում հանդէս է եկել Հարաւսլաւիայի հայութեան մասին յօդուածներով: Դրանց մի մասը յետագայում ամփոփուել է Յակոբ-Գրիգորի յօդուածների ժողովածուի մէջ<sup>4</sup>: Հայ-հարաւսլաւական կապերի պատմութեամբ զբաղուել են նաեւ բանասէր Աշոտ Յովակիմեանը եւ զրոյ, թարգմանիչ, սերբագէտ, Հայաստանում Սերբիայի պատուաւոր հիւպատոս Բարկէն Սիմոնեանը<sup>5</sup>, ինչպէս նաեւ սերբ հեղինակ Եովօ Պայիչը, որի «Հայերը Սերբիայում» ուսումնասիրութիւնն ընդգրկուել է 2003ին

Բելգրադում լոյս տեսած *Հայերը. Պատմութիւնը, Եղեռնը, Գաղթը* գրքում<sup>5</sup>։ Մի քանի պատմաբաններ հայ գաղթավայրերին նուիրուած ուսումնասիրութիւններում անդրադարձել են Սերրիայի հայ համայնքին<sup>7</sup>։

Սոյն ակնարկով ձգտել ենք համախմբել ինչպէս Հարաւսլաւիայի երկրներում հայերի ներկայութեան վերաբերեալ եղած պատմական իրողութիւնները, այնպէս էլ առանձին հայերի՝ Հարաւսլաւիայի երկրների եւ հարաւսլաւցի ժողովուրդների՝ հայ ժողովրդի հետ ունեցած առնչութիւններին վերաբերող փաստերը<sup>8</sup>։

### ՇՓՈՒՄՆԵՐ ՄԻՋՆԱԴԱՐՈՒՄ (Ժ.-ԺԸ-դդ.)

Ըստ Յակոբ-Գրիգորի՝ «Հայ եւ սերպ յարաբերութիւնները ոչ մէկ ատեն տեղի ունեցած են պատմութեան մէջ, եթէ չհաշուենք մէկ քանի հայերու գործունէութիւնը այս պետութեան մէջ։ Կարելի է հետեւաբար առանց այլեայլի ըսել, որ հայ տարրը Պալքանեան բոլոր պետութիւններու մէջ ամենէն քիչ ազդեցութիւնը Եուկոսլաւիոյ մէջ է որ ունի»<sup>9</sup>։ Բելգրադի Համալսարանի պրոֆեսոր դոկտոր Տիտոմիր Ջորջեւիչը (Թիտոմիր Ճորճեւիչ, Tihomir Georgević) հայերի մասին ասել է. «Մենք որ բաւական հեռու ենք ապրել նրանցից, շատ բան ենք պարտք հայի քաղաքակրթիչ ոգուն։ Մեր առաջին բժիշկը եւ նկարիչը հայեր են եղել, մեր առաջին գրքերը տպուել է մի հայի կողմից, մեր մէջ ճարտարարուեստը եւ վաճառականութիւնը մտցնողները հայեր են եղել»<sup>10</sup>։ Սերրական աղբիւրների քննութեամբ հնարաւոր կը լինի պարզել, թէ որքանով է ստոյգ այս տուեալը եւ թէ ովքե՛ր են եղել այդ բժիշկը, նկարիչը եւ տպագրիչը<sup>11</sup>։

Հայերի ներկայութիւնը Հարաւսլաւիայում սկսուել է ժ. դարից, երբ երկրի տարածքում բիւզանդական կայսրերի կողմից վերաբնակեցուել են պաւլիկեան աղանդի հետեւորդ հայեր, ապա նաեւ՝ հայ առաքելականներ եւ քաղկեդոնականներ։ Հայեր են բնակուել Բիտոլիէ եւ Օհրիդ քաղաքներում։ Ճարտարապետութեան պատմաբան Յովհաննէս Խալիֆախեանը եւ բիւզանդագէտ Հրաչ Բարթիկեանը անդրադարձել են Հարաւսլաւիայի տարածքում գտնուած հայերէն վիմագիր արձանագրութիւններին։ Դրանցից մէկը յայտնաբերուել է 1948ին՝ Պետրովէց քաղաքից 10 կլմ. արեւելք գտնուող Վիտովնիցի վանքի (Manastir Vitovnica) Սուրբ Յակոբ եկեղեցում։ Այնտեղ գտնուած սերբերէն-հայերէն երկլեզու արձանագրութիւնը կատարուած է 1218ին։ Երկրորդ արձանագրութիւնը, թուագրուած 1202, յայտնաբերուել է 1966ին, Մակեդոնիայի հարաւում, Պրիլեպի վարոչ գիւղի Ս. Դիմիտրիոսի եկեղեցում<sup>12</sup>։ «Այսպի-

սով XIII դարի հենց սկզբին գոյութիւն ունեցող Ս. Առաքելոց հայկական եկեղեցին վկայում է, որ Պրիլեպի շրջանում եղել է բազմամարդ հայկական համայնք»<sup>13</sup>: Հայերի ներկայութեան վկայութիւնն է նաեւ Վրաշաչ քաղաքից 21 կլմ. հիւսիս-արեւմուտք հռաւորութեան վրայ գտնուող Երմենովցի գիւղը (այժմ Հարաւային Բանատի շրջանում, Վոյվոդինայի Ինքնավար Նահանգում): Երմենովցի սերբերէն նշանակում է «հայեր»: Բնակավայրը յայտնի է նաեւ գերմաներէն անուանումով Ürmenshausen եւ հունգարերէնով՝ Ürményháza, որ երկու լեզուներով էլ նշանակում է «հայերի տուն»<sup>14</sup>:

Աւելի ուշ շրջանի են վերաբերում Սերբիայի տարածքում հայկական վանքերի գոյութիւնը եւ հայ ճարտարապետութեան՝ սերբականի վրայ ունեցած հնարաւոր ազդեցութիւնը: Յայտնի է, որ հայազգի օսմանեան ճարտարապետ Միմար Սինանի նախագծով շէնքեր են կառուցուել Բիտոլիէում (Մակեդոնիա) եւ Սարաեւոյում: Ծարտարապետութեան պատմարան Օգիւստ Շուազի կարծիքով՝ հայ միջնադարեան ճարտարապետութիւնը որոշակի ազդեցութիւն է թողել Հարաւսլաւիայի տարածքում գտնուող սերբական ճարտարապետութեան վրայ<sup>15</sup>:

Հորվաթիայի Ռագուզա կամ Դուբրովնիկ քաղաքի պաշտպան սուրբն է Սերաստիայի քրիստոնեաների հովուապետ հայորդի Վլասիոսը կամ Վլասը (Գ.-Դ.դդ.), որ հորվաթներին յայտնի է Սվետի-Վլասօ, Վլասա, Վլասօ Բլագ կամ Սվետի Բլագ անուաններով: Այս հայ սրբի պաշտամունքն այնքան ուժեղ է եղել Հորվաթիայում, որ ժամանակին երկիրն անուանել են «Սուրբ Բլագի հանրապետութիւն», նրա պատկերը ժԵ. դարում դրոշմուել է երկրի խորհրդանշանի վրայ, ժԶ. դարում՝ ծովային դրոշին, ժԸ. դարում՝ մետաղադրամների վրայ: Նրա պատկերով ստեղծուել են բազմաթիւ քանդակներ եւ փորագրանկարներ, իսկ Դուբրովնիկի Դոմինիկեան եկեղեցում գտնուում է իտալացի մեծանուն նկարիչ Տիցիանի (1476-1576)՝ սուրբ Վլասին պատկերող գեղանկարը: Սուրբ Վլասի անուանով եկեղեցիներ կան ոչ միայն Դուբրովնիկում, այլեւ Հորվաթիայի տասնեակ բնակավայրերում եւ կղզիներում (Զագրէբ, Կոմիցա, Ստոն)<sup>16</sup>: ԺԳ. դարում Մոնտէնեգրոյի թագուհի, ծագումով Ֆրանսուհի Հելէն դ'Անժուէն Ուլկինի (Ուլչինյ) բնակավայրում կառուցել է Սուրբ Վլասոյի անուամբ եկեղեցի, իսկ Սկոպիէի ժԴ. դարի սուրբ Մարկոյի եկեղեցու որմնանկարներից մէկում առկայ է Վլասի կերպարը<sup>17</sup>:

Դուբրովնիկի մասին խօսելիս յիշենք նաեւ, որ ժԲ.-ժԳ. դարերի հայազգի հերոս Հանտոնացի Բէովէի մասին ասպետական վէպն ունեցել է տարբերակներ եւրոպական մի քանի երկրներում, նաեւ՝ Դուբրովնի-

կում<sup>18</sup>: Ի դէպ, Հորվաթիային պատկանող կղզիներից մէկը կոչւում է Sipan, սակայն թերեւս այս նմանութիւնը Հայաստանի Միփան լեռան հետ զուտ պատահականութիւն լինի:

Սերբ ժողովուրդը յիշուում է արդէն ԺԲ. դարի հայ բանաստեղծ Գրիգոր Տղայի (1133-1194) «Ահա ձայնեմ ձայն ողբագին» սկսուածքով վիպերգում (յայտնի որպէս «Ողբ Երուսաղէմի»): Այնտեղ յիշատակուած են եւրոպական մի շարք երկրներ եւ ժողովուրդներ, որոնց անունները թուարկում է մահմեդականներից գրաւուած անձնաւորուած Երուսաղէմը: Նա ողբում է, որ Եւրոպայից շատերը կարող էին օգնութեան հասնել, սակայն այդպէս էլ ոչ ոք չի սատարել իրեն («Եւ ոչ որ չիասաւ ինձ ի թիկին»), եւ անունների երկար շարքում յիշում է նաեւ «Ոչ թագաւոր Սերպաց ազգին»<sup>19</sup>:

Ըստ Միլոշ Յրեանսկու գրառած աւանդութեան՝ սերբ առաջին արքեպիսկոպոս սուրբ Սաւան եղել է Հայաստանում եւ շինարար վարպետներ է հրաւիրել սերբական եկեղեցիների կառուցման համար<sup>20</sup>: Մէկ այլ աւանդութեան համաձայն՝ այն հայերը, որոնք օսմանեան զօրքի կազմում մասնակցել են 1389ի Կոստոյի ճակատամարտին, չկամենալով կռուել քրիստոնեաների դէմ, թաքնուել են Սոկորանիա քաղաքին մերձ Օզրէն լեռան վրայ: Այստեղ էլ, 1392ին, ի նշան սերբերի հետ համերաշխութեան, կառուցել են Երմենչիչ վանքը, յայտնի որպէս Հայկական վանք: Այն թէեւ պատմութեան ընթացքում մի քանի անգամ աւերել եւ հրկիզել են թուրքերը, սակայն եկեղեցին կանգուն է ցայժմ<sup>21</sup>:

ԺԳ.-ԺԴ. դարերում Դուբրովնիկում եղել է կիլիկեցի հայ վաճառականների փոքրաթիւ համայնք: 1430ին Դուբրովնիկ է ժամանել Հռոմ ուղեւորուող մի հայազգի եպիսկոպոս: Այս քաղաքում հայեր բնակուել են նաեւ ԺԷ. դարում. դրա ապացոյցն է այն, որ հայազգի իտալացի բժիշկ, ծնունդով նորջուղայեցի Զորջօ Բալլիւին (Baglivi, 1668-1707) ծնուել է Դուբրովնիկում:

Հայ-հարաւսլաւական կապերը նոր փուլ են մտել, երբ 1459ին Օսմանեան կայսրութիւնը փերջնականապէս գրաւել է Սերբիան: 1521 Օգոստոսի 28ին սուլթան Սիւլէյման Կանունիի (եւրոպական գրականութեան մէջ՝ Սիւլէյման Հրաշալի, թագաւորել է 1520-1566) ղեկավարութեամբ օսմանեան զօրքերը գրաւել են Բելգրադի միջնաբերդը: Քաղաքը մեծ մասամբ հողին է հաւասարուել: Սակայն յաջորդ 150 տարիներին Բելգրադը եղել է խաղաղ բնակավայր, աւելի արեւելեան մի քաղաք՝ օսմանեան ճարտարապետութեամբ եւ նորակառոյց մզկիթներով, որ համարուել է Արեւելքի եւ Արեւմուտքի դարպասը: Օսմանեան Սերբիան

ԺԵ.-ԺԶ. դարերում ունեցել է 100 հազարից ավելի բնակչութիւն, իսկ նրա մայրաքաղաքը դէպի իրեն է ձգել առեւտրականների եւ այնտեղ բնակուել փափագողների՝ հայերի, յոյների, թուրքերի, իտալացիների եւ այլոց մեծաթիւ խմբերի: Բելգրադում հաստատուած հայերի թիւը յատկապէս մեծ է եղել Կրայիա Պետրա կամ Դուբրովնիկի փողոցում, որը եղել է քաղաքի առեւտրի կենտրոններից: Մինչեւ 1920-30ականները՝ այդ փողոցի շինութիւնները վերականգնելիս պատերին յայտնաբերուել են հայերէն մակագրութիւններ<sup>22</sup>: Հայերը Բելգրադում առաջին անգամ յիշատակուել են 1573ին: Մատենագիր Գրիգոր Դարանաղցու (1576-1643) վկայութեամբ՝ 1604-1605 թթ. ջալալիների վայրագութիւնների եւ թուրք-իրանական պատերազմների տարիներին Հայաստանի արեւելեան սահմաններից եւ Ղրիմից հայեր են հաստատուել Սերբիայում: Խոսելով Սուլթան Ահմէդի (1603-1617) իշխանութեան մասին, նա մասնաւորապէս նշել է, որ նրա ժամանակ «հայք եւ տաճիկք աստ հաւաքեալ եւ ցրուեալ մինչեւ զԲելլրդատն մինչեւ ցաշխարհն Պուղտանաց եւ Գոթացոց եւ ամենայն Իսկուքացոց»<sup>23</sup>: Բելգրադի անուանումը մէկ այլ ձեւով է նա յիշատակել նոյն ժամանակագրութիւնի մէջ. «յորժամ... յԱստամբոլ եկաք, եւ յամենայն հայոց աշխարհին ի Թէոդուպոլսէն ի վայր, ոմանք երկու ամաւ յառաջ եկեալ էին եւ ոմանք քազումք ընդ մեզ եկին, որ էր թվ. ՌՃԴ (1605), եւ շատք այլ յետոյ եկին եւ ցրուեցան յԱնատոլ եւ յԱստուեյս յամենայն քաղաքս, մինչ ի Պելլրդատ, մինչ Պուղտանաց աշխարհն եւ ի Լեհաց»<sup>24</sup>: Բելգրադի հայերին յիշել է նաեւ 1669ին Հարաւսլաւիայում ճանապարհորդած անգլիացի ճանապարհորդ-բժիշկ էդուարդ Բրաունը, որը Բելգրադում իջեւանել է մի հարուստ հայ առեւտրականի տանը<sup>25</sup>:

Հայերի թիւն աճել է նաեւ առեւտրական ճանապարհների վրայ գտնուող Նիշ եւ Պիրոտ քաղաքներում: Ճանապարհորդ-մատենագիր Սիմէոն Լեհացին (1584-1637), 1611-1613 ժամանակահատուածում ճամփորդելով Կ-Պոլսից Վենետիկ, անցել է Հարաւսլաւիայի տարածքով եւ իր Ուղեգրութիւնի մէջ յիշել տեղացի հայերին: Նա 12 օր մնացել է Սկուբ (Սկոպիէ) քաղաքում: «Եւ այնտեղ երեք տուն հայ կար, այգեպաններ՝ խիստ հիւրասէր եւ Աստծու երկիւղած, որ մեզ ընդունեցին իրենց մօտ, այգում, եւ մխիթարեցին մեզ կերակրով եւ անուշ խօսքերով...»<sup>26</sup>: Այնուհետեւ Լեհացին եղել է Պոսնա-սարայում (այժմեան Սարաեւօն), «որ մեծ քաղաք էր՝ շինուած բարձր լեռան վրայ: ...Չորս հայ վաճառական գտանք այնտեղ, որոնք մեզ սիրով ընդունեցին եւ մեծարեցին իջեւանատանը՝ մխիթարելով մեզ... Երկու օր մնացինք այնտեղ:

Եւ երկրի մարդիկ մեծ ու բարձրահասակ հսկաներ էին, ուժեղ ու զօրաւոր, երկայն ու յաղթանդամ: Բնաւ չգիտեն տաճկի լեզուն, այլ միայն պուլղարի»<sup>27</sup>: Այստեղ Լեհացին սերբահորվաթերէնը շփոթել է բուլղարերէնի հետ:

1634ին Եւրոպա կատարած ճանապարհորդութեան ժամանակ Բելգրադ է այցելել Մինաս Գրիչը, որը գրել է «Մի ի թուոցն հազարին» տողով սկսուող մի չափածոյ ուղեգրութիւն: Բելգրադ քաղաքի մասին նա գրել է հետեւեալը.

Ողորմութեամբ աստուածային,  
Հասաք աւան Դանոբ գետին,  
Որ էր քաղաք դղեակ նմին,  
Չոր Պէլկրատ վերածայնին:

Սա է անուամբ Թրակիայ,  
Որ եւ կոչի Եւրոպիայ  
Մտաք դղեակ գիւղ աւանի,  
Չոր Պէլկրատ նա որ ասի:

Խիստ մխիթար տեսաք զսա,  
Որ մոռացուց վիշտս մեր սա,  
Յամէն բարեաց լցեալ էր սա,  
Առատութեամբ ձուկն, որ ի սմա:

Ամէն դիհաց գովեալ էր սա,  
Առատութեամբ բարիքն ի սմա,  
Խիստ աղքատաց տեղիք էր սա,  
Չոր եւ տեսաք աչօք մեր սա:

Այլ յիսնակաց տեղիք էր սա,  
Յառատութեամբ բարիքն ի սմա,  
Դանոբ գետովն լցեալ էր սա,  
Եւս առաւել ձուկն, որ ի սմա<sup>28</sup>:

Այս հարիւրամեակում Բելգրադը յիշատակուել է հայ մատենագրութեան այլ նմուշներում եւս, յատկապէս՝ ձեռագրերի յիշատակարաններում: Նիւրնբերգի քաղաքային գրադարանում պահուող հայերէն մի Տաղարան գրուել է Բելգրադում: Եւղոկիայում 1631ին գրուած մի

հայերէն ձեռագրում յիշուում է Բելգրադի գրաւումը թուրքերի կողմից<sup>29</sup>։ 1684ին ընդօրինակուած մի Յայմաւաւուրքում կայ մի ժամանակագրութիւն, որտեղ, ի թիւս ժամանակի կարեւոր իրադարձութիւնների, յիշուած է առասպելանման մի դէպք, թէ ինչպէս «Եւ դարձեալ ի ՌՉԲ (1633) թուին ի Բելլորդաթ տաճիկ մի խոզ դարձաւ»<sup>30</sup>։

1685ին Բելգրադում է եղել գրող եւ ազգային գործիչ Գաբրիէլ Թոխաթեցին, որն այդ մասին նշել է իր 1688 թուակիր պատկերագարող յիշատակարանում (պահուում է Վիեննայի կայսերական Մատենադարանում) «ԹՎոյն Հայոց ՌՃԼԳ, Լաթենացոց 1685, ես եկի Սեպտեմբերի 20 Թուրքաց երկրէն՝ Պ(ե)լլորդատու, ի Պուտիմ»<sup>31</sup>։ Շարունակութեան մէջ Թոխաթեցին եւս մէկ անգամ յիշել է Բելգրադը. «ԹՎոյն 1688 ես ի Հայոց ՌՃԼԵ յունիսի ամսոյ 5 Նէմցան առաւ Ըստօնի Պելլորդատ վերայով. եւ եր միջի փաշան տէրէիտէցի շէյխ օղլի Ահմէտ փաշան երես գրերթն եւ ինքն ու միջի լինող Թուրքն ելան գնացին դէպի Թունայու Պելլորդատ։ ԹՎոյն 1688 քուրվիրշուն, որ է տուքայ տու Պավերան, սա եառ Մեծ Պելլորդատն ի Թուրքէն յեիրուշով սեպտեմբերի ամսոյ 15»<sup>32</sup>։ Նոյն գրութեան մէջ յիշել է, որ 1682ի Յունիսի 28ին ինքը «եկի Պելլորդատ, ետոյ Պուտիմ»<sup>33</sup>։

1691ին գրուած մի Աւետարանի յիշատակարանում եւս յիշուած է նոյն թուականին Բելգրադի գրաւումը թուրքերի կողմից. «Տաճկունք... եկին առին զՊուտիմ եւ զՊելլիկրատ եւ զՆիշ մինչեւ ի Սօֆիա, գոր հերուն ամի կրկին գնացին Տաճկունք եւ առին զՆիշ եւ զՊելլիկրատ»<sup>34</sup>։ Մխիթարեան հայր Եղիա վարդապետ Կ.Պոլսեցին Բելգրադից 1735ի Յունիսի 3ին նամակ է յղել Մխիթար Սերաստացուն, տեղեկացնելով, որ Եւդոկիայից նամակ է եկել Բելգրադ, որտեղ նկարագրուած են Թոքաթ տանող ճանապարհները<sup>35</sup>։

Հայ-սերբական կապերի վաղ օրինակներից է Ժէ. դարի վերջին պոլսահայ միջավայրում աշխատած Յակոբ երէցը, ծնունդով Բելգրադից։ Բայթիմօրի Ուոլթրրոզ պատկերասրահում պահուում է նրա ընդօրինակած եւ պատկերագրողած մի Շարակնոց (Ms W. 547), որի յիշատակարանում նշուած է. «Աստուածաւանդ սուրբ շարակնոցս գրեցաւ ի խնդրոյ աստուածապաշտ Նուասարդի որդի Ելափս, ի վայելումն որդոցն, եւ ետ երկոցունց յիշատակ Աստուածատուրին, եւ միս որդոյն (Ս)ահակին, եւ սա գրեցաւ ձեռամբ Պելիգրատցի Յակոբ երէցվէ ի մայրաքաղաքն Կոստանդինուպօլի, ի թուականիս հայոց ոճիւ (=1678) օգոստոս ամսոյ ԺԵ (15)»<sup>36</sup>։ Այս շրջանում Կ.Պոլսում ընդօրինակուած մի շարք մատեանների մանրանկարներում նկատելի է նրա ինքնատիպ

ձեռագիրը, որ կրում է հայկական եւ օսմանեան մանրանկարչութեան կնիքը, ինչպէս նաեւ եւրոպական դպրոցի որոշակի ազդեցութիւնը: Լեւ արուեստարան էւա Բալիցկա-Վիտակովսկան ենթադրել է, որ այս նոյն նկարչին են պատկանում Ուփսալայի (Շուեդիա) Համալսարանի գրադարանում պահուող 1681ին գրուած մի հայերէն հմայիլի պատկերագարդումները<sup>37</sup>:

Բելգրադում աւստրիական գրաւման ժամանակ հայերը որոշ արտօնութիւններ են ստացել, այդ թւում՝ եկեղեցի ունենալու: Լէոպոլդ կայսեր թոյլտուութեամբ 1690ին Մովսէս վարդապետ Երեւանցին սկսել է Բելգրադի հայկական եկեղեցու շինարարութիւնը: ԺԸ. դարի սկզբին եկեղեցու քահանան է եղել Տէր Պօղոսը: Այս եկեղեցին յիշել են իրենց ճանապարհորդական նոթերում Ֆրանսիացի Կիկլէն (1658), գերմանացի Աուէրը (1664) եւ վերոյիշեալ անգլիացի Բրաունը (1669)<sup>38</sup>: Եկեղեցուն կից եղել է գերեզմանատուն, որը յիշատակել է գերմանացի ճանապարհորդ Բրանդշտեյնը<sup>39</sup>: 1717ին աւստրիացիները Բելգրադի հայերին են ցանկացել տրամադրել քաղաքի Չէյնադին աղայի մզկիթը՝ եկեղեցի դարձնելու համար: Այսօր Բելգրադի Կալեմեգդան գրօսայգում գտնուում է հայկական արձանագրութեամբ երեք տապանաքար, որոնք մնացել են այդ եկեղեցուց: Դրանք պատկանել են 1685ին Բելգրադում մահացած վանեցի Յունանին (Յովնան), 1714ին մահացած շոռոթցի Մուրատին եւ մահտեսի Մուսէսին: Երկրորդ տապանաքարի կողքին պահպանուել է նաեւ մի խաչքար<sup>40</sup>:

1722ին Բելգրադն արդէն ունեցել է 80 հայ բնակիչ: 1728ին՝ Սերբիայում ապրել է շուրջ 200 հայ, մեծ մասը՝ Բելգրադում, որտեղ եղել է հայկական թաղամաս<sup>41</sup>: 1777ի տուեալով Բելգրադի Չեմուն արուարձանում եղել է 1130 տուն 6800 բնակիչներով, որոնց կէսը եղել են սերբեր, մնացածը՝ կաթողիկներ (յատկապէս գերմանացիներ), հրեաներ, հայեր եւ մահմեդականներ: Բելգրադի հայութեան հոգեւոր հովուութիւնը ստանձնել է Վիեննայի Մխիթարեան Միաբանութիւնը: Սակայն երբ 1739ին թուրքերը գրաւել են Բելգրադը եւ աւերել եկեղեցին՝ հայերը գաղթել են Աւստրիայի կազմի մէջ մտնող Նովի Սադ (Նասեաց) եւ Պետրովարադին քաղաքները, որոնցից առաջինում արդէն եղել է փոքրաթիւ հայ կաթողիկէ համայնք: Եռտով Նովի Սադը դարձել է սերբերի մշակութային եւ քաղաքական կենտրոնը եւ կոչուել «սերբական Աթէնք» (Srpska Atina): 1746ին հիմնուել են Նովի Սադի հայ կաթողիկէ Ս. Գրիգոր Լուսաւորիչ եկեղեցին եւ հայկական դպրոցը: Փողոցը, որտեղ գտնուել է եկեղեցին, անուանուել է Հայկական, իսկ եկեղեցուց մինչեւ

Դանուբի ափը կառուցուած հողապատնէշը՝ Հայկական թուօք: Բացու-  
մից մի քանի տարի անց Դանուբը յորդելով՝ մեծ վնաս է պատճառել Նո-  
վի Սադին ու նաեւ Հայկական եկեղեցուն<sup>42</sup>: Վիեննաբնակ նուիրակի մի-  
ջոցով տեղի հայերը դիմել են Հռոմին, եւ այդպիսով ձեռք բերած 7756  
Ֆիորինգ գումարով հնարաւոր է եղել վերականգնել եկեղեցին: Սակայն  
դրանով չեն վերջացել եկեղեցուն հասած փորձանքները: Ս. Գրիգոր Լու-  
սաւորիչ եկեղեցին հրդեհուել է 1848ին եւ վերականգնուել 1874ին, երբ  
Մարիա Թրիանտաֆիլ անունով մի ուղղափառ կին սեփական միջոցնե-  
րով վերանորոգել է եկեղեցին՝ ճարտարապետ Գէորգ Մոլնարի նախա-  
գծով եւ առեւտրական Յովհաննէս Ճանազիզեանի մեկենասութեամբ:  
Այս եկեղեցին քանդուել է համայնավարական վարչակարգի օրօք՝  
1964ին<sup>43</sup>: Այժմ այդ եկեղեցու հայատառ արձանագրութիւն կրող մի սա-  
լիկը պահուում է Պետրովարադինեան ամրոցի թանգարանում, իսկ եկե-  
ղեցու տեղում գետեղուած է խաչքար: Պահպանուել է նաեւ Սիմէոն Մե-  
լիք Ճանազիզեանի գերդաստանի մահարձանը: 1717-1913 Նովի Սադի  
հայ համայնքն ունեցել է 20 հովուապետ (17ը Վենետիկից, 3ը Վիեննայից,  
իսկ բնիկ նովիսադցի Սիմէոն Բարամենցը աւելի քան 30 տարի եղել է ե-  
կեղեցու աւագերէց)<sup>44</sup>: 1845ի մի վիճակագրութեան համաձայն Նովի  
Սադն ունեցել է 17332 բնակիչ, որոնց մէջ 9675 ուղղափառ քրիստոնե-  
աներ, 5724 կաթոլիկներ, 1032 բողոքականներ, 727 հրեաներ եւ հայկա-  
կան կաթողիկէ եկեղեցու 30 հետեւորդներ<sup>45</sup>:

Օսմանեան հայազգի պետական եւ քաղաքական գործիչներ, ծագու-  
մով անեցի Ապրոյեանները, որոշ ժամանակ բնակուել են Բելգրադում:

1718ին Հռոմի Ուրբանեան դպրոցի աշակերտ, կարնեցի Խաչատուր  
վարդապետ Առաքելեանը, չկարողանալով կաթոլիկութիւն քարոզել Կ.  
Պոլսում, փախել է Սերբիա՝ իր գործունէութիւնը շարունակելու Բելգ-  
րադում<sup>46</sup>: 1737ին Բելգրադի հայերը տեղափոխուել են Հունգարիա՝  
հաստատուելով սահմանամերձ Ուլվիդէք կամ Հայոց քաղաքում: ԺԸ.  
դարում հայերը սկսել են հաստատուել նաեւ այլ քաղաքներում (Նիշ,  
Զագրէբ, Կոսովօ, Օսիէկ, որի առաջին սրճարանատէրը եղել է Յովհան-  
նէս Մանուկը):

Սերբիայի հետ այլեւայլ առնչութիւններ են ունեցել նաեւ մերձակայ  
երկրների, յատկապէս Հունգարիայի, Ռումինիայի, Լեհաստանի հայ  
բնակիչները: Հունգարահայ Կիշ, Լազար եւ Դանիէլ ընտանիքները տնօ-  
րինել են մեծ հողատարածութիւններ Բաշկայում եւ Բանատում<sup>47</sup>:  
1781ին սերբական ժխտիչտէ կամ Բեգէյ Սվետի Դուրադ փոքր քաղաքը  
դարձել է հունգարահայ առեւտրական իսակ Կիշի սեփականութիւնը:

Սերբական մշակոյթին իր նպաստն է բերել լեհահայ հեղինակ Տողոր Աւրամովիչը, որը 1790ին Պեչուժ հրատարակել է գերմաներէն-սերբերէն բառարան<sup>48</sup> :

### ԱՌՆՁՈՒԹԻՒՆՆԵՐ ԺԹ-Ի. ԴԱՐԵՐՈՒՄ

Յատկապէս ժԹ. դարում արեւմտահայութիւնը մի շարք առիթներ է ունեցել ճանաչելու Հարաւսլաւիայի ժողովուրդներին, որոնք նոյնպէս գտնուել են օսմանեան տիրապետութեան ներքոյ: Նրանցից բոսնիացիներին (մահմեդական հարաւսլացիներին) արեւմտահայերը ճանաչել են նրանց տրուած թուրքերէն անուանումով՝ պոչնաղ/պոչնագ, որտեղից էլ սերել է հայկական Պոչնաղեան ազգանունը: ԺԷ. դարի հեղինակ Յովհաննէս Կամենացին նրանց յիշել է պոսնացի, իսկ երկիրը՝ Պոսնա ձեւով<sup>49</sup>: Արեւմտահայութիւնը յատկապէս կապեր է ստեղծել Սկոպիէ (յայտնի նաեւ Ուշկուբ կամ Սկուպ անուններով) քաղաքի հետ, որն աշխարհագրականօրէն աւելի մօտ էր Կ.Պոլսին:

Սերբական նոր մշակոյթի եւ լեզուի զարգացմանը իւրոպսանն նպաստել է Վիեննայի Մխիթարեան Միաբանութիւնը: Սերբ լուսաւորիչ, բանասէր, արդի սերբահորովաթերէն լեզուի հիմնադիր Վուկ Ստեֆանովիչ Կարաճիչը (Stefanović Karadžić, 1787-1864) իր պատմական բառարանը հրատարակել է Վիեննայի Մխիթարեան տպարանում: Նրա առաջին գրքերը լոյս էին տեսել Սերբիայում, սակայն առանց սերբական հոգեւոր առաջնորդի՝ միտրոպոլիտի արտօնութեան: Այս իրողութիւնը սաստիկ զայրացրել է սերբ կղերականներին, քանի որ այդ ժամանակ նրանց ձեռքին է եղել սերբերէն գրքեր տպագրելու մենաշնորհը: Կարաճիչն իր գործը տեղափոխել է Վիեննա, որտեղ չէր տարածուում միտրոպոլիտի ազդեցութիւնը: Տեղեկանալով, որ Մխիթարեան տպարանն ունի սլաւոնական (կիւրեղեան) տառամայրեր՝ նա 1818ին այնտեղ հրատարակել է իր կոթողային աշխատութիւնը՝ *Սերբական Բառարանը*: Դա պատմութեան մէջ առաջին սերբերէն գիրքն էր, որ գրուած էր նոր ուղղագրութեամբ, ժողովրդական լեզուով, միաժամանակ՝ առաջին սերբերէն եւ առհասարակ սլաւոնական գիրքը՝ տպուած Վիեննայի Մխիթարեանների մօտ<sup>50</sup>: Հետաքրքիր է նշել, որ Կարաճիչին հայ մամուլը (Թիֆլիսի Արձագանքը) առաջին անգամ անդրադարձել է նրա 100ամեակի առթիւ՝ նրա ազգանունը հանդէս բերելով Ղարաճիչ ձեւով<sup>51</sup>:

Կարաճիչից յետոյ Վիեննայի Մխիթարեանների տպարանում է հրատարկուել նաեւ սերբական առաջին այբբէնարանը (1827) եւ Չեռնոգորիայի իշխան, եպիսկոպոս եւ բանաստեղծ Պետար Բ. Պետրովիչ-Նիեզաչի

(Petrović-Njegoš, 1813-1851) *Հեռնային Պսակ* (Gorski vijenac) փիլիսոփայական գիրքը (1841)<sup>52</sup>, ինչպէս նաեւ *Երեք օր Տրիեստում 1844ի Յունուար ամսին* (Tri Dana u Triestu u Mesecu Januariusu 1844) գիրքը (1844)<sup>53</sup>։

1830ականների վերջին սերբական արքունիքում աշխատել է սառը գէնքերի նորոգող վարպետ Գրիգոր Մարկովիչը (Մարկոսեա՞ն)։ 1837ին նա իր միջոցներով հրատարակել է սերբ գրող, հոգեւորական Վիկենտի Ռակիչի գիրքը։ 1856ին սերբական կառավարութիւնը նրան առաջարկել է հիմնել սրբեր արտադրող ձեռնարկութիւն<sup>54</sup>։

1848-1852 Սերբիայի, Բոսնիայի եւ Հերցեգովինայի ազգային ազատագրական պայքարի վերաբերեալ բազմաթիւ հրապարակումներ են եղել հայ մամուլում (*Եւրոպա, Հայաստան, Արշայոյս Արարատեան, Բանասէր*)<sup>55</sup>։

1877-1878ի ռուս-թուրքական պատերազմում Ռուսաստանի յաղթանակը վճռական դեր է ունեցել Սերբիայի եւ Չեռնոգորիայի անկախութեան նուաճման գործում, եւ Բեռլինի Վեհաժողովի որոշմամբ այդ երկու երկրները ստացել են անկախութիւն՝ ազատագրուելով օսմանեան դարաւոր լծից։ Հայ մամուլում սկսել են յաճախ տպագրուել Հարաւսլաւիայի երկրների մասին պատմող նիւթեր<sup>56</sup>։ Այս իրողութիւնը հայ մտաւոր շրջանակները տողորել է լաւատեսութեամբ՝ յոյս ներշնչելով, թէ մի օր էլ Հայաստանը կը ստանայ անկախութիւն։ Այս իրողութիւնն այլարանօրէն ներկայացուել է նաեւ աշուղ Զիւանու երգերում։ «Հօ Տառը» ծածկագիր բանաստեղծութեան մէջ Զիւանին աշխարհագրական անունները տուել է սկզբնատառերով՝ նշելով, որ «Հող»ն (Հայաստանը) երազում է «Մէ»ի (Սերբիայի) եւ «Բէն»ի (Բոսնիայի) պէս ազատագրուել եւ տեղ գտնել «բառգրքում» (աշխարհում)։ Մէկ այլ երգում նա գրել է, որ Քեռու (Ռուսաստանի) շնորհիւ ազատագրուել են Սրբուհի մօրաքոյրը (Սերբիան) եւ սիրուն Ելենան (Հերցեգովինան), իսկ Հայկուհին (հայ ժողովուրդը) եւ Մարիամը (Մակեդոնիան) դեռեւս արիւն են լայիս եւ յոյսով սպասում են իրենց ազատագրմանը։ Զիւանին ազատագրուած Սերբիան յիշել է նաեւ «Հարաւի Մրմունջը» երգում՝ դարձեալ որպէս Հայաստանի նախկին բախտակից քրոջ<sup>57</sup>։

Ըստ 1895ի սերբական վիճակագրութեան՝ Սերբիայում բնակուել է 43 հայ, (որոնցից երեքը՝ կին) հետեւեալ պատկերով․ Բելգրադ՝ 6, Վալեւօ՝ 3, Չայզար (հաւանաբար Չադար)՝ 4, Նիշ՝ 5, Շարաց՝ 4, Պոստարեւաց՝ 3, մնացեալը՝ այլ քաղաքներում, իսկ Բոսնիա-Հերցոգովինայում՝ միայն 3 հայ<sup>58</sup>։ Նովի Սադում ի. դարի սկզբին բնակուել է շուրջ 100 հայ, որոնք ակնառու տեղ են գրաւել քաղաքի հասարակական եւ մշակութա-

յին կեանքում, ընտրուել քաղաքային խորհրդի մէջ, եղել հարուստ առեւտրականներ: Աչքի ընկնող ընտանիքներից էին Ճանազիգեանները, Մինասեանները, Աւետիքեանները եւ Իշեկուցները (Խսեկուցեան), իսկ Եոսիֆ Միստրովովիչը (Յովսէփ Մեսրոպեան) եղել է Նովի Սադի լաւագոյն ոսկերիչներից<sup>59</sup>: Այս ժամանակաշրջանում Օսմանեան կայսրութիւնը տարրեր հայերի գանազան պաշտօններով ուղարկել է Հարաւսլաւիա լի քաղաքներ: Այսպէս, 1900ին օսմանեան կառավարութեան կողմից որպէս փոխհիւպատոս Օզիշէ (հաւանաբար Օսիէկ)՝ քաղաքն է ուղարկուել Յովհաննէս էֆենդի Մաթակեանը<sup>60</sup>: Սերբիայի Վրանիա քաղաքի օսմանեան դեսպանատանը պաշտօնավարել են Սկոպիէում ծնուած Զենոր Սուրէնեանը (1910ից)<sup>61</sup> եւ Արիս Ֆեաճեանը (1868-1937)՝ Առաջին Բալկանեան Պատերազմի տարիներին (1912-1913)<sup>62</sup>:

Մասնաւորապէս 1910ականներին Սերբիային եւ Բալկանների հարցին յաճախակի է անդրադարձել հայ մամուլը<sup>63</sup>: Յակոբ-Գրիգորի կարծիքով՝ հայերը ճակատագրով նման են սերբ եւ մակեդոնացի ժողովուրդներին: «Մերպ ազգին տառապանքը, նախ Թուրքերու, յետոյ ալ Աւստրո-Հունգարիոյ տիրապետութեան տակ, շատ կը նմանի հայերու տառապանքին: Անոնք, ինչպէս մենք, կոուեցան երկու բռնակալութիւններու դէմ, որոնցմէ մին՝ Թուրքը՝ որպէս հասարակաց թշնամի: ...Պէտք է ճանչնանք այս ցեղին յատկութիւնները, սիրենք զինքն ու իր եզական ստեղծագործութիւնները՝ չափով մը հատուցանելու համար այն սէրը, զոր ցոյց տուին Եուզոսլաւները մեր ազգին հանդէպ»<sup>64</sup>, ապա նաեւ՝ «Ճակատագրի բերումով նոյն կացութեան մէջ գտնուող հայ եւ մակեդոնացի ժողովուրդները զիրար դիրաւ կը հասկնան եւ իրարու հետ միայն եղբայրական յարաբերութիւններ կրնան ունենալ»<sup>65</sup>:

Յայտնի է, որ Առաջին Բալկանեան Պատերազմում բուլղարական բանակի Մակեդոնա-Օդրինեան երկրապահ զօրքերի կազմում մարտնչել է Հայկական Կամաւորական Վաշտը՝ զօրավար Անդրանիկի գլխաւորութեամբ: Այսպիսով, հայերը հանդէս են եկել որպէս Բուլղարիայի դաշնակից հարաւսլաւական պետութիւնների՝ Սերբիայի եւ Զեռնոգորիայի շահերի պաշտպաններ: Սակայն Երկրորդ Բալկանեան Պատերազմի ժամանակ (1913ի Յունիս-Օգոստոս), երբ Բուլղարիայի դէմ միաւորուել են Սերբիան, Զեռնոգորիան, Յունաստանը, Ռումինիան եւ Օսմանեան կայսրութիւնը, այդ ժամ բուլղարական զօրքում մարտնչող հայորդիներն ակամայ դարձել են հարաւսլաւական ժողովուրդների հակառակորդը: Նրանցից յատկապէս աչքի է ընկել փոխգնդապետ եւ զինուորական փաստարան կարապետ Վարդազարեանը Ֆիլիպէից: Նա յայտնի է

դարձել սերբերի եւ յոյների դէմ մղուած ճակատամարտերում, ամբողջական ջոկատներ ազատելով կորստից<sup>66</sup> :

Առաջին Աշխարհամարտի տարիներին Հարաւսլաւիայի տարածքում օսմանեան բանակի կազմում հանդէս են եկել բազմաթիւ հայորդիներ, որոնց մի մասը գերի է ընկել: 1919ին Կ.Պոլսի Հայոց Պատրիարք Զաւէն արքեպիսկոպոսը յատուկ գրութեամբ դիմել է Կ.Պոլսի սերբական ներկայացուցչին՝ խնդրելով ազատ արձակել Բելգրադում գտնուող թուրքահայ եւ բուլղարահայ գերիներին: Պատրիարքն այդ առթիւ յայտնել է, որ դաշնակից երկրներն արդէն ազատ են արձակել իրենց հայ գերիներին՝ համարելով նրանց բարեկամ ազգի ներկայացուցիչներ<sup>67</sup> : Հայ գերիների ցանկը լոյս է տեսել Մարսէլի Արմենիա թերթում (9.03.1920), մի թղթակցութեան հետ միասին, որտեղ ներկայացուել է նրանց դառը վիճակը: Յօդուածում խնդրուել է Կ.Պոլսի Պատրիարքի կամ այլ պաշտօնական անձանց միջամտութիւնը՝ նրանց ազատ արձակելու հարցում: 1920ի Մարտի 22ին Արմենիային ուղարկուած նամակում նշուել է, որ Սահակ Գէորգեանը իրրեւ պատուիրակ բազմիցս դիմումներ է կատարել Հարաւսլաւիայի կառավարութեանը, եւ վերջապէս ազատ են արձակուել թուրքական եւ բուլղարական բանակներից առնուած հայ ռազմագերիները: Բոլորը ողջ-առողջ վիճակում Բելգրադից ուղարկուել են Սալոնիկ<sup>68</sup> :

Ծնունդով քեմախցի վաճառական Սահակ Գէորգեանը (Սաւա Գէորգով կամ Գէորգիելիչ, Georgiewitch), որ 30 տարի Հարաւսլաւիայի քաղաքացի է եղել, իր ձեռքում է ունեցել սուրճի առեւտրի մենաշնորհը Հարաւսլաւիայի մայրաքաղաքում, տեղական իշխանութիւնների հետ իր ունեցած յարաբերութիւններով ազդեցիկ դիրք է գրաւել Բելգրադում եւ մշտապէս աջակցել է հայ ազգային գործերի յաջող կարգադրութեանը<sup>69</sup> : Գէորգեանի ջանքերով Սերբիայի առեւտրի նախարար Վ. Վելկովիչը մի որոշմնագրով հաստատել է, որ Սերբիայում բնակուող հայերին պետութիւնը համարի սերբական քաղաքացիներ եւ առեւտրական տեսանկիւնից նրանց առանձնաշնորհումներ ընծայեն: Իր այդ քայլը Վելկովիչը պատճառարանել է այն իրողութեամբ, որ հայերը պատերազմի ժամանակ եղել են սերբերի բարեկամները, եւ երբ կազմուի հայկական պետութիւնը՝ սերբերն էլ Հայաստանում պիտի վայելեն նոյն իրաւունքները, ինչ որ հայերը Սերբիայում: Երբ այս որոշումը տպագրուել է մամուլում, Սահակ Գէորգեանը հայ ազգի անունից շնորհակալութիւն է յայտնել Վելկովիչին՝ հայ ազգի գործունէութիւնը եւ առեւտրական ձիրքը գնահատելու համար<sup>70</sup> : Երբ 1920ի Փետրուարի 26ին Աւե-

տիս Ահարոնեանը Գէորգեանին առաջարկել է լինել Բելգրադում Հայաստանի պատուոյ հիւպատոս, վերջինս պատասխանել է, որ ինքն արդէն սերրական իշխանութիւններից ունի հայկական անձնագրերը վաւերացնելու լիազօրութիւն: Նա նաեւ յայտնել է, որ շատ երիտասարդ հայորդիներ կամենում են մեկնել Հայաստան եւ մարտնչել<sup>71</sup>: 1920ի Հոկտեմբերի 1ին Հայաստանի Հանրապետութիւնը Գէորգեանին նշանակել է պատուաւոր փոխհիւպատոս<sup>72</sup>:

1919-1920ականներին Հայ Ազգային Պատուիրակութիւնը բանակցել է սերր-հորվաթ-սլովէնական պատուիրակութեան գլխաւոր քարտուղարի եւ Սերրիայի Արտաքին Գործերի Նախարար Նինչիչի հետ՝ Հայկական Հարցի, Հայաստանի վերաբերեալ գրականութեան եւ տեղեկագրերի առաքման եւ պատուիրակութեան անդամ Միհրան Սվազլիի կողմից Հարաւսլաւիայում հայկական օջախ ստեղծելու առաջարկի մասին<sup>73</sup>: 1922ին Հայ Ազգային Պատուիրակութիւնը դիմել է Սերրիայի, Բուլղարիայի եւ Ռումինիայի կառավարութիւններին՝ հայ գաղթականներին ընդունելու խնդրով: Այս ժամանակաշրջանում սերր-հայկական զօրակցութեան արտայայտութիւնների ենք հանդիպում նաեւ այլ երկրներում: Այսպէս, 1918ի Մայիսի 30ին Միացեալ Նահանգների Դիթրոյթ քաղաքում տեղի ունեցած մեծ ցոյցին մասնակցել են քաղաքի հայկական եւ սերրական, ինչպէս նաեւ այլ ազգութիւնների կազմակերպութիւններ: Յատկանշական է, որ սերրերի կարգախօսը եղել է «պատերազմը Հայաստանէն կը վերջանայ»<sup>74</sup>:

Մեծ Եղեռնից եւ 1922ի Զմիւռնիայի աղէտից յետոյ Հարաւսլաւիա հասած սակաւաթիւ հայերը՝ պոլսեցիներ, կիլիկեցիներ եւ քեմալսցիներ (դարանաղցիներ), հիմնականում ապաստանել են Բելգրադում եւ Սկոպիէում, ինչպէս նաեւ ուրիշ քաղաքներում (Նիշ, Վրնիաշկա Բանիա, Կրուշեւաց, Չայէչար, Նեգոտին, Կնիաժեւաց եւն.)<sup>75</sup>: Սերրիայի աշխարհագրական դիրքը եւ ժողովրդի նկարագիրը յատուկ ձգողականութիւն են ունեցել հայերի համար<sup>76</sup>: Ինչպէս յիշել է հին սերրահայերից մէկը՝ Մարի Բարոնեանը. «Սերրերը մեզ եւ միւս գաղթականներուն սրտաբաց ընդունեցին, եւ մենք ալ սիրեցինք հիւրընկալ ու ազնիւ այդ ժողովուրդը.... յարմարուեցինք միջավայրին, շատերը քացին մեծ ու փոքր խանութներ ու սկսեցին սուրճի գործ ընել, քանի որ ատշահութաբեր գործ մըն էր: Մեր գաւակներն ալ սերբական դպրոց ձգեցինք, քանի որ Բելգրադին մէջ հայկական դպրոց չի եղած եւ հիմա էլ չկայ, քայց ընտանիքում հայերէն կը խօսէինք, որ գաւակներս գոնէ լսելով սորվէին իրենց մայր լեզուն»<sup>77</sup>: Յատկանշական է, որ մրցակցու-

թիւնից եւ նրա անախորժ հետեւանքներից խուսափելու համար նոր գործ սկսող հայերն ընտրել են այնպիսի քաղաքներ, որտեղ սուրճի գործով զբաղուող հայ շլիինի<sup>85</sup> :

1922ի տուեալով՝ Սերբիայում եւ ողջ Հարաւսլաւիայում բնակուել են 165 հայեր (86 տղամարդ, 38 կին, 41 երեխայ), մեծ մասամբ քեմախցիներ, նաեւ որոշ թուով սերաստացիներ եւ պոլսեցիներ: Քեմախցիների մեծաթիւ ներկայութիւնը Հարաւսլաւիայում կարելի է թերեւս բացատրել հաստատուած առաջին ընտանիքների կողմից իրենց ազգականներին հրաւիրելու եւ ապա վերջիններիս կողմից իրենց միւս հարազատներին իրենց կերպ կանչելու շղթայակերպ մողէլով: Շատ քիչ բացառութիւններով բոլորը զբաղուում են առեւտրով, այն դէպքում, երբ իրենց հայրենիքում հողագործներ են եղել: Հինգ-վեց հոգի բարձրագոյն կրթութիւն ունեն (3 բժիշկ, 4 դեղագործ, մէկ լեզուաբան), կան նաեւ մի քանի ուսանողներ:

1924ին Սերբիայում հաստատուած առեւտրական Լուիֆֆիկ կիւլմէզեանին յաջողուել է երկրում ստանալ գորգագործութեան մենաշնորհ եւ Բելգրադում հաստատել գորգի գործարան: Նա մեկնել է յունական կորֆու կղզին՝ այնտեղ գտնուող ազշեհիրցի գաղթականների միջից գորգագործութեան վարժ գործաւորուհիներ գտնելու եւ Սերբիա տանելու համար, որը նրան չի յաջողուել<sup>86</sup> : Այդ գործը յաջողեցրել է Սերբիայի Պեչկերէք քաղաքից գործարանատէր Մ. Իլիճին, որն իր Ֆարբիկային կից հաստատել է գորգագործարան եւ կորֆուից բերած Չ հայ աշրիների եւ որրուհիների համար մշտական գործ է ապահովել: Գորգագործարանը դեկավարել է Պետրոս Ադամեանը<sup>87</sup> :

Բելգրադում հաստատուած քեմախցիները ունեցել են իրենց Հալբենակցական միութիւնը, որը 1925ի Յունուարի 30ին գումարած ժողովով ընտրել է նոր վարչութիւն եւ անուանուել «Դարանաղեաց Հալբենակցական Միութիւն»: Այս միութիւնը նպատակադրել է օգնել Հարաւսլաւիա եկող հայերին՝ հնարաւորութիւն տալով նրանց ինքնարաւ լինել, նիւթապէս ոտքի կանգնել: Անդամները որոշել են կապեր հաստատել Սերբիայում, Յունաստանում, Բուլղարիայում, Ռումինիայում եւ ԱՄՆում հաստատուած բոլոր քեմախցիների հետ եւ համընդհանուր նիւթական եւ բարոյական աջակցութեամբ մի գիւղ հիմնադրել Երեւանի շրջանում<sup>88</sup> : Ստեղծուել է 90 հազար դինարի հասնող հիմնադրամ: Սակայն այդ դրամից օգտուող չի եղել եւ պետական զբամատանը պահ տուած՝ մնացել է անձեռնմխելի<sup>89</sup> :

1932ին հիմնուել է Բելգրադի Հայոց Միութիւնը, որը սեփական միջոցներով գնել է Դալմատինսկայա փողոցի թիւ 78 հասցէում գտնուող շէնքը՝ յայտնի որպէս Հայկական Տուն: Այստեղ պարբերաբար հաւաքուել են քաղաքի հայերը, հնչել է հայկական երգ-երաժշտութիւն, դասախօսել են Հայոց պատմութեան վերաբերեալ, հայոց լեզու է դասաւանդել Սալոնիկից տեղափոխուած Նոյեմի Մանաշեանը, հայոց պատմութիւն՝ Ասատուր Մկրտչեանը: Գործել է փոքրիկ երգչախումբ՝ Գրիգոր Մորճիկեանի ղեկավարութեամբ<sup>83</sup>: Հայոց Միութեան միջոցները գոյացել են միանուագ մուտքի վճարումներից, անդամավճարներից, նուիրատուութիւններից, կազմակերպուած հանդէսներից ստացուած հասոյթներից: Միութեան տրամադրութեան տակ է դրուել Դարանաղեաց Հայրենակցական Միութեան հաւաքած 90 հազար դինար գումարը: Բելգրադի հայերը ծրագրել են կառուցել նաեւ Ազգային տուն՝ այդ նպատակի համար հանգանակելով 40 հազար դինար<sup>84</sup>: Այս ձեռնարկը, սակայն, մնացել է անկատար:

«Հայկական Տուն»ը գործել է մինչեւ 1941, գործունէութիւնը դադարել է Բ. Աշխարհամարտի տարիներին, իսկ 1952ին Սերբիայի համայնավարական իշխանութիւնները փակել են այն:

1933ի տուեալով՝ Բելգրադում բնակուել է 120-130 հայ, ներառեալ 15-20 երեխաներ, որոնք յաճախել են սերբական դպրոցներ: Մեծ մասամբ եղել են խանութպաններ՝ տնտեսական լաւ վիճակով, բացառութեամբ մի քանի ընտանիքի<sup>85</sup>: Այս թուականին հայ մամուլին ուղարկուած մի թղթակցութիւն ահագանգել է հայ կեանքի ներկայ վիճակի վերաբերեալ: Այնտեղ մասնաւորապէս նշուում է, որ ոչ կուսակցութիւնը (նկատի ունեն Հայ Յեղափոխական Դաշնակցութիւնը), ոչ եկեղեցին հոգ են տանում փրկելու համար փոքրաթիւ, բայց բարեկեցիկ համայնքը: «Գաւառներու մէջ բնակուող Հայերու ազգային վիճակը այլ տեղի սեւ է: Այլասերունը այնքան առաջ գացած է որ, մօտ ապագային ոչ մէկ հայկական ընտանիք պիտի կրնանք գտնել: ...Անցեալ տարի կաթողիկոսական ընտրութեան առթիւ ժողով մը տեղի ունեցաւ, ուր ընտրուեցաւ առժամեայ վարչութիւն մը բարեգործական ընկերութեան մը ծրագիրը պատրաստելու եւ արտօնութիւն ստանալու համար: Բայց ոչ ոք գիտէ, թէ յարգոյ վարչութիւնը ի՞նչ կ'ընէ...»<sup>86</sup>:

1937ի Փետրուարի 14ին Բելգրադում կայացել է Հարաւսլաւիայի Հայերի Երկրորդ Տարեկան Ժողովը: Զեկուցուել է, որ մէկ տարուայ մէջ 54,929 դինարի մուտք եւ 18,480 դինար ելք է եղել: Ժողովն ընտրել է նոր վարչութիւն առաջիկայ տարուայ համար<sup>87</sup>:

Սկոպիէում ազգանուէր գործունէութեամբ է գրադուել Մարտիրոս աւագ քահանայ Գալֆայեանը, որն անխոնջ եւ անվաստակ տքնել է՝ ոչ միայն տեղի հայութեան կրօնական պէտքերը հոգալու, այլեւ նոր սերնդին հայոց լեզու ուսուցանելու գործում: Նրա մահը 1930ականների սկզբին մեծ կորուստ է եղել Սկոպիէի հայութեան համար<sup>88</sup>:

1933ին Սկոպիէի հայերի մէջ յիշուում են հետեւեալ անձինք. Յովսէփ Պոյաճեան՝ սերբական պետական բանակի եւ հիւանդանոցների ճանաչուած բժիշկ, Պօղոս Արմաղանեան եւ Յակոբ Պիքիճեան՝ գլխակապի առեւտրականներ, Կարապետ Դաւիթեան՝ բժիշկ, ներքին եւ մանկական հիւանդութիւնների մասնագէտ, նաեւ գրող (որդին բժիշկ-լեզուարան Ստեփան Դաւիթեանի<sup>89</sup>), Կարապետ Կարապետեան՝ ապուխտ եւ երչիկ արտադրող, Վ. Գալֆայեան՝ ատամնարոյժ, Նիկողայոս Արտեմեան՝ պետական ծխախոտագործութեան փորձագէտ, Ահարոն Թ.՝ սրճագործ, Կարապետ Քէօմիւրճեան, Ար. Միքայէլեան՝ ոսկերիչ, Յակոբ Ղուկասեան, Յակոբ Ծրրճրրեան՝ մուշտակավաճառ, Մահտեսի Աւետիս Նաթանեան՝ մեծահարուստ, անգլիական հիւպատոսարանի փոխ-հիւպատոս, Լեւոն Մելքոնեան՝ բժիշկ, Յարութիւն Գալփաքճեան, Թադէոս Քանտի՝ դեղագործ, Արրահամ Սիւրմէլեան՝ աղիքի վաճառական, Միքայէլ Բիոսեան՝ դեղագործ, Վարդգէս Բիոսեան՝ ելեկտրագէտ, Մինաս Քիւրքիեան, Յակոբ եւ Կարապետ Թաշճեաններ՝ ձիարշաւի ձիերի տէրեր<sup>90</sup>: Սալոնիկից Սկոպիէ տեղափոխուած Յակոբ Սալոյեանցը քաղաքում հիմնել է մի խոշոր հաստատութիւն<sup>91</sup>: 1920ականներին 10-12 հայ ընտանիք է բնակուել նաեւ Մակեդոնիայի Սորովիչ քաղաքում. նրանք աշխատել են երկաթուղային կայարանում, հաց վաստակել՝ վագոններ դատարկելով: Նրանց մէջ եղել են նաեւ պայտագործներ<sup>92</sup>:

1928ին Սարայելոյի մօտակայ մի գիւղում է հաստատուել իզմիրցի Թագուոր Թագուորեանը, որը 20 տարի բնակուել էր Գերմանիայում: 1929ի ձմռանը նա սպանուել է խորհրդաւոր պայմաններում<sup>93</sup>:

Փոքրաթիւ սերբահայերն անտարբեր չեն եղել իրենց փոքրիկ հայրենիքի՝ Պորհրդային Հայաստանի հանդէպ: 1927ին Շիրակի երկրաշարժից յետոյ նրանք կատարել են հանգանակութիւն եւ աղէտեալների օգնութեան հիմնադրամին են ուղարկել 16580 դրնար: Հայրենակիցների օգնութեանը նպաստ բերած այդ 27 սերբահայերի ցուցակը հրատարակուել է Յառաջ թերթում, որտեղից իմանում ենք, որ այդ ժամանակաշրջանում Հարաւսլաւիայում հայեր բնակուել են ոչ միայն Բելգրադում եւ Սկոպիէում, այլեւ Նիշ, Զայէչար, Զուպրիա, Պալանկա, Մլադինո-

վաց, Պիրոտ, Օպրենովաց, Կրակուլյիվաց, Վալեօ, Սվիլալյնաց, Պոժարե-  
լաց, Տրստենիկ եւ Արանջելովաց բնակավայրերում<sup>94</sup>։

Համախմբող մարմիններ չունենալը, փոքր թիւը եւ խառնամուսնու-  
թիւնները արագացրել են Հարաւսլաւիայի հայերի ձուլումը։ Արդէն  
1930ականներին տեղի հայ մտաւորականներն ահագանգել են հարաւ-  
սլաւահայերին սպառնացող ուժացման եւ ձուլման վտանգի դէմ։ Նովի  
Սադի հայ եկեղեցու ղեկավար, յայտնի բանասէր, Մխիթարեան Միարա-  
նութեան անդամ, Հանդէս Ամսօրեայի երբեմնի խմբագիր Գարրիէլ  
Ժայրագոյն վարդապետ Մենելիշեանը (1864-1936), որը մահացել է Նովի  
Սադում, 1933ին հետեւեալն է գրել հարաւային Սերբիայի հայութեան  
մասին. «Հոս ալ վտանգը մեծ է՝ ինչպէս նաեւ բովանդակ Սերպիոյ մէջ  
գտնուած հայութեան... Պելկրատ մայրաքաղաքն իսկ՝ դարերէ ի վեր  
ունի իր պատերուն մէջ հայազգի ընտանիքներ, հարուստ ու աղքատ,  
ճարպիկ ու թոյլ, ծոյլ ու գործունեայ հայորդիներ, բայց կազմակերպ-  
եալ գործարանատրութեան պակասութիւն է, չկան հոն ոչ մատուռ, ոչ  
քահանայ, ոչ եկեղեցի, ոչ դպրոց, ոչ ժողովատեղի, ոչ համարում իրա-  
րու եւ ոչ ազգախնամ հոգատարութիւն»։ Ըստ Մենելիշեանի՝ վիճակն է՛լ  
աւելի տխուր է Սկոպիէում. «Կը կորսուի անպատճառ հայութիւնը հոն,  
որ աղերսն ու յարաբերութիւնը՝ ազգին մեծագանգուած մասին հետ  
կը խլուի»<sup>95</sup>։ Նա ցաւով նշել է, որ օտար դպրոց գնացող հայ մանուկն ա-  
րագ օտարախօս է դառնում, հայ երիտասարդը նախընտրում է օտա-  
րուհու հետ ամուսնանալ, իսկ գաղութում ընդարմացած է ձեռներէցու-  
թեան ոգին, նկատուում է համատարած անտարբերութիւն<sup>96</sup>։ Սակայն  
Մենելիշեանը տակաւին յոյս է ունեցել, թէ ամէն ինչ կորած չէ, «Յուսա-  
լիք կ'ետն այն է, որ նորափոխ Սկոպիյէի (sic) մէջ ապրող մեր ազգա-  
կիցներէն շատ շատերը մինչեւ հիմա աննպաստ պարագաներու մէջ  
կրցած են քիչ թէ շատ պահել իրենց հայութիւնը»<sup>97</sup>։

Հարաւսլաւիայի մեծագոյն օրաթերթը՝ Բելգրադի Պոլիտիկան,  
1935ի Ապրիլի 15ի համարում անդրադարձել է Նովի Սադի հայ համայն-  
քի ձուլման եւ կորստեան փաստին՝ ներկայացնելով նաեւ հայր Գարրիէլ  
Մենելիշեանի եւ հայկական եկեղեցու լուսանկարները։ «Ամէն որ կը  
ճանչնայ տասը լեզու խօսող այդ ալետր Հայրը։ Կարելի է իրեն հան-  
դիպիլ Նովի Սատի շուկան գնումներու պահին, զամբիղը ձեռքը։ Ան-  
հօտ եկեղեցին բնական է որ հասոյթի աղբիւրներ չունի, բայց գտնուե-  
լով գիւղի կեդրոնը՝ Աղեքսանդր պողոտայի վրայ, առանց այցելու չի  
մնար։ Անտարակոյս [տեղացի] կաթոլիկները չեն երթար հոն աղօթե-  
լու, մինչ բողոքականները եւ բարենորոգչականները յաճախ կ'այցե-

լեն, քանի որ առաջինները պաշտամունքի վայր չունին, իսկ միսնե-  
րունը գիւղին կեդրոնէն շատ հեռու է: Հայ եկեղեցին առաւօտէն մինչեւ  
երեկոյ բաց է. այս իսկ պատճառաւ շրջակայներէ եկող հիւրեր կ'այ-  
ցելեն»<sup>98</sup>:

*Նոյն թերթը յիշել է, որ հայ համայնքը ժամանակին մեծ թիւ է կազ-  
մել, շատ ընտանիքներ բազմազաւակ են եղել, մինչեւ անգամ յիշուած է  
մի փաստ, որ մի հայուհի միանգամից երեք զաւակ է ունեցել: Մական  
հայկական անցեալը յուշ է մնացել, եւ այդ ամէնից մնացել է միայն մէկ  
անհատ՝ հայր Մենեւիշեանը, առանց ծխի, առանց որեւէ գործունէու-  
թեան: Այս առթիւ Յակոբ-Գրիգորը ցաւով նշել է. «Կարելի չէ՞ր որ դա-  
ւանական խտրութիւնները մէկ կողմ դնելով ծաղկեցնէինք բոլոր Հա-  
յերս՝ միացած Եուզոսլաւիոյ միակ հայ եկեղեցին, որ առանց Հայո  
մնացե՛ր է... Բելգրադի ու Սկիպի հայ գաղութը՝ բոլորն ալ հայադա-  
ւան՝ սիրով պիտի օգնեն Նովի Սադի հայ եկեղեցին: Հայր Գաբրիէլ  
կրնայ հայադաւան քահանայ մը գտնել, եւ անոր միջոցով Եուզոս-  
լաւիոյ բոլոր Հայերը խմբել Նովի Սադի հայ եկեղեցիին շուրջ: Իր ան-  
կեղծութեան վրայ չենք կասկածիր»<sup>99</sup>:*

1935ին Հարաւսլաւիայում բնակուել է 500 հայ, գլխաւորապէս՝  
Բելգրադում եւ Սկոպիէում<sup>100</sup>: Մական հակառակ այդ փոքր թուին՝ հա-  
յութիւնը տեղացիների կողմից անձանօթ տարր չի եղել<sup>101</sup>: 1939ի տուեա-  
լով Հարաւսլաւիայում բնակուել է 452 հայ, որոնցից Բելգրադում՝ 142  
հոգի, Սկոպիէում՝ 200 (45 ընտանիք): Մտադիր են եղել վաճառել Նովի  
Սադի հայկական եկեղեցին՝ մօտ 300 հազար դոլարով<sup>102</sup>:

Ինչպէս արդէն նշուեց, Նովի Սադում հայկական համայնք չլինելու  
պատճառով եկեղեցին դադարել է գործել եւ 1964ին քանդուել սոցիալիս-  
տական իշխանութեան կողմից:

1930ականներին հարաւսլաւական մամուլը զգալի հետաքրքրութիւն  
է ցուցարբերել հայ ժողովրդի զաւակների քաղաքակրթական եւ մշակու-  
թային նուաճումների հանդէպ: Յատկապէս Սկոպիէի Vardar (գետի  
անուն) եւ Բելգրադի Vreme (ժամանակ) օրաթերթերի աշխատակից,  
գրող-հրապարակախօս Լիուբօ Ստոյովիչը (Ljubo Stojović, ծն. 1909)  
1935ի Ապրիլի 10ին մի յօդուած է հրատարակել, որ ներկայացնում է  
Սկոպիէի պատմութեան մէջ հայերի ունեցած դերը: Յօդուածի ենթա-  
վերնագրերն են՝ «Սկոպիէի հայերի մասին, որոնք մեր անկեղծ քաղա-  
քացիներն են, Հայերն էին, որ առաջին անգամ էլեկտրական լոյս բե-  
րեցին Սկոպիէ: Նաեւ հայերն էին, որ առաջին քուրը բերեցին Սկոպ-  
իէ»: Անդրադառնալով հայ ժողովրդին՝ որպէս աշխարհում առաջինը

բրիտանէութիւն ընդունած ազգի, Ստոյոյիչն անդրադարձել է Արդուլ Համիդի կազմակերպած հայկական ջարդերին: Ահա այս օսմանեան սուլթանը հայ յեղափոխականների է աքսորել նաեւ Սկոպիէ: Նրանցից էր հայ Արմենական (Ռամկավար) Կուսակցութեան ղեմքերից Հաջի Աւետիս Նախանեանը, որ սերել է Վանի յայտնի գերդաստանից եւ, ինչպէս նշուեց, եղել է բրիտանական փոխհիւպատոսը Սկոպիէում մինչեւ Ա. Աշխարհամարտը: Ստոյոյիչը վկայել է, որ Սկոպիէ քաղաքում առաջին ելեկտրական լույսը բերողը 1911ին եղել է ծնունդով կեսարացի ինժեներ Մկրտիչ Ծամճեանը, որը յետագայում բերել է նաեւ խողովակով ջուր: Օսմանեան անտառապահական վարչութեան տնօրէն Արամ Հալէբեանը մեծ ներդրում է ունեցել Սկոպիէի կանաչապատման գործում: Հարաւսլաւական բանակի փոխգնդապետ բժիշկ Յովսէփ Պոյաճեանը մեծ օգուտ է տուել Սերբիայի ռազմական կեանքին: Կեսարացի բժիշկ Կարապետ Ս. Դաւիթեանը Հարաւսլաւիայում տարածուած հիւանդութիւնների, յատկապէս մալարիայի (տենդ) մասնագէտ է եղել: Իսկ նախկին ղեղազոր՝ Միքայէլ Բիոսեանը եղել է հարաւային Սերբիայի գրեթէ բոլոր հանքերի գիտակ՝ այդպիսով օգտակար հանդիսանալով հարաւսլաւական իշխանութիւններին<sup>103</sup>:

Հայերին յաճախակի անդրադարձել է նաեւ Բելգրադի Vreme թերթը, որի սերբ խմբագիրը եղել է սուրճի վաճառական Սահակ Գէորգեանի փեսան: Վերջինս եղել է ազգային երեսփոխան, հարաւսլաւական խորհրդարանի ընդհանուր քարտուղար, հայերի անկեղծ բարեկամն էր եւ իր թերթի էջերում բազմիցս ծանօթացրել է հայ ժողովրդին: Հայ ժողովրդին եւ հայ եկեղեցին մօտիկից ճանաչել եւ գնահատել է նաեւ 1930-1937 Սերբիայի Ուղղափառ Եկեղեցու Համայն Պատրիարք, սերբ նշանաւոր կրօնական գործիչ Վառնաւան (Varnava Rosić, 1880-1937)<sup>104</sup>:

1936ին Բուլղարիայի Հայոց Առաջնորդական Փոխանորդ Գրիգոր ծայրագոյն վարդապետ Կարապետեանն այցելել է Բելգրադի հայերին, քանի որ Ամենայն Հայոց Կաթողիկոսի հրամանով նա ստանձնել է նաեւ Հարաւսլաւիայի հայերի հովուութիւնը: Մինչ այդ Բելգրադի հայոց հոգեւոր կարիքները հոգացել է Բելգրադի պատրիարք Վառնաւան: Գրիգոր վարդապետը պատարագել է Գաղութային Վարչութեան անդամ եւ ազգային գործիչ Մամաս Դաւիթեանի բնակարանում: Մօտ 50 հոգի այդ օրը հաղորդութիւն են ստացել: Բելգրադի եւ Սկոպիէի հայերը որոշել են գնել ազգային տուն, որը ծառայելու է որպէս մատուռ, խորհրդարան եւ քահանաների բնակարան<sup>105</sup>: Գրիգոր վարդապետը տեղեկացրել է, որ Բելգրադում բնակւում է 140 հայ ընտանիք (35 ընտանիք, մնացեալը՝ ա-

մուրհիներ), որոնք մեծ մասամբ գրադուում են սրճագործութեամբ, նպարավաճառութեամբ եւ նիւթապէս ապահովուած են: Նրանք կազմել են 12 հոգուց բաղկացած Բելգրադահայ Գաղութային Վարչութիւն հետեւեալ կազմով- նախագահ՝ Յարութիւն Պաղտասարեան, փոխնախագահ՝ Խորէն Կարապետեան, քարտուղար՝ Յարութիւն Չայրքեան, գանձապահ՝ Սամուէլ Կոկանեան, խորհրդականներ՝ Գրիգոր Սեմերճեան, Յարութիւն Շէխեան, Վահան Գուրթեան, Վահրամ Վարդանեան, հաշուեքննիչ՝ Վահան Միրախորեան, Ռուբէն եւ Ասատուր Մկրտիչեան (Բուլղարեւհայ Բառարանի հեղինակը): Գրիգոր վարդապետի վկայութեամբ, նիշում ընակուել է երեք հայ ընտանիք, Սկոպիէում՝ 25: Այստեղ եւս կազմուել է Գաղութային Վարչութեան մասնաճիւղ՝ ենթակայ Բելգրադի Գաղութահայ Վարչութեանը: Ենթավարչութեան նախագահն էր գնդապետ Յովսէփ Պոյաճեանը, գանձապետը՝ Պօղոս Արմաղանեանը, քարտուղարը՝ Յակոբ Զորճորեանը: Գրիգոր վարդապետը յարգոյ այցելութիւն է կատարել նաեւ Հայաստանի առաջին Հանրապետութեան Սերբիայի պատուոյ հիւպատոս Սաւա Գէորգեանի շիրմին<sup>106</sup>:

1940ին Բելգրադում կայացել է Հարաւսլաւիայի Հայերի Ազգային Վարչութեան տարեկան հինգերորդ ընդհանուր ժողովը, որին մասնակցել են շուրջ 40 երկսեռ անդամներ: Վարչութեան նախագահ Պաղտասարեանն առաջարկել է ընդհանուր ժողովի անունից Հարաւսլաւիայի թագաւոր Պետր Բ-ին արեւշատութեան հեռագիր յղել<sup>107</sup>:

Երկրորդ Համաշխարհային Պատերազմը մեծ անպատեհութիւններ եւ դժբախտութիւններ է ստեղծել Հարաւսլաւիայի հայութեան համար<sup>108</sup>: Նրանցից շատերը մասնակցել են զաւթիչների դէմ հարաւսլաւական ժողովրդի պայքարին<sup>109</sup>: Համայնավարական վարչակարգի հաստատումից յետոյ շատ հայեր արտագաղթել են ԱՄՆ, Կանադա, Բրազիլիա, եւրոպական այլ երկրներ:

## ԱԿԱՆԱԻՈՐ ՀԱՐԱԻՍԼԱԻԱՀԱՅԵՐ

Հարաւսլաւիայի հայութիւնը չի ունեցել խիստ կազմակերպուած համայնքային կեանք: Տեղական առումով, այն սակայն տուել է աչքի ընկնող անհատներ, որոնց հարկ ենք համարում անդրադառնալ:

Դեռեւս Առաջին Բալկանեան Պատերազմից շատ տարիներ առաջ, սալոնիկցի Յակոբ Փիւսքիւճեանը առաջին անգամ պատրաստել է «քաշքաւալ» կոչուող նշանաւոր պանիրը, որ դարձել է Մակեդոնիայի արտածման գլխաւոր ապրանքատեսակներից: Մակեդոնուհի Սիտիչը

ատենախօսութիւն է պաշտպանել քաշքաւայի մասին՝ մակեդոնահայերից տեղեկութիւններ հաւաքելով Փիւսքիւճեանի վերաբերեալ<sup>110</sup>։

Բուլղարական հայազգի գրող, թարգմանիչ, հրատարակախօս, դասական մշակոյթի մասնագէտ Ալեքսանդր Բալարանովի (1879, Շտիպ, Մակեդոնիա-1955) հօրենական պապը՝ Մանօ (Մանուկ) Քեհայեանը, եղել է Փոքր Ասիայից, Սկոպիէի մեջլիսի նախագահը եւ քաղաքի դպրոցներից մէկի հիմնադիրը, իսկ հայրը՝ Միքայէլ Բալարանովը (Միխայէլ Բալարանեան), եղել է բժիշկ՝ Շտիպ քաղաքում։ Ի դէպ, Ալեքսանդր Բալարանովի եղբայրը մնացել է Մակեդոնիայում՝ դառնալով մակեդոնական բանակի սպայ՝ Բալարանովիչ անունով<sup>111</sup>։

Հարաւսլաւիայի պատմութեան ականաւոր դէմքերից մէկին՝ Նիկոլա Պաշիչին (Nikola Pašić, 1845-1926) վերագրուում է հայկական ծագում։ Այս մասին վկայել է Հարաւսլաւիայում բնակուած տնտեսագէտ Վահան Տոտոմեանցը Բելգրադում հրատարակած Հայերի Դերը Համաշխարհային Քաղաքակրթութեան մէջ գրքոյկում, մասնաւորապէս նշել է, թէ վերջինիս հակառակորդները պարսաւանքի թիրախ են դարձրել նրա հայկական ծագումը<sup>112</sup>։ Պաշիչի հայկական ծագումը կրկնել է Յակոբ-Քրիզորը՝ նշելով, որ նրա նախնիները եղել են Փաշայեաններ<sup>113</sup>։ Այսօր Հարաւսլաւցիներն անտեղեակ են այս իրողութեանը, սակայն չենք կարող չվստահել Տոտոմեանցի պէս լուրջ մի գիտնականի հաւաստիացմանը, որը բնակուել է Հարաւսլաւիայում եւ քաջատեղեակ է եղել այդ երկրի պատմութեանն ու լեզուին։ Նիկոլա Պաշիչը փաստօրէն Հարաւսլաւիայի ստեղծողն էր, որը եղել է նախ Սերբիայի վարչապետ եւ արտաքին գործերի նախարար (1891-92, 1904-18), ապա՝ դեսպանորդ Ռուսաստանում (1893-94), իսկ յետագայում՝ Սերբերի, հորվաթների եւ սլովէնների միացեալ թագաւորութեան վարչապետը (1921-1926)։

Նիկոլա Պաշիչը անտարբեր չի եղել հայ ժողովրդի ճակատագրի հանդէպ։ Այդ է վկայում Երեւանի Գրականութեան եւ Արուեստի Թանգարանում պահուող նրա մի Ֆրանսերէն հեռագիրը՝ գրուած 1913ի Յունուարի 11ին, Բելգրադից ուղղուած Աղեքսանդրիա՝ հոգեւորական գործիչ Ռուբէն Գարիկեանին։ Ներկայացնում ենք ցարդ անտիպ հեռագրի Ֆրանսերէն բնագիրը․

La population arménienne jouissant d'une grande sympathie de la nation serbe la peuple serbe fera tout ce qu'il pourra en faveur et pour améliorer le sort des populations chrétiennes d'Anatolie.

Pachitch<sup>114</sup>

Հարաւսլաւ դիւանագէտ եւ լրագրող Ալեքսանդր Մալխասունին (դը Մալխագունի) սերել է երեւանցի ազնուական ընտանիքից: Եղել է վերո-  
 յիշեալ Հաջի Աւետիս Նաթանեանի ազգականը: Նա ծնուել է Սկոպիէում  
 (այլ տուեալով՝ Ֆիլիպպէում, Բուլղարիա), մահացել 1914ին, Փարիզում:  
 Եղել է Կ.Պոլսի Աւստրիայի հիւպատոսարանի թարգման: Ապա տեղա-  
 փոխուել է Մակեդոնիա: Նիկոլա Պաշիշի կողմից նշանակուել է Սերր-  
 իայի հիւպատոս Փարիզում: 1900ին Փարիզում կայացած համաշխարհա-  
 յին ցուցահանդէսում ներկայացուել է նրա ջանքերով ստեղծուած սեր-  
 րական ազգագրական թանգարանը: 1906ին նրա մասին առաջին անգամ  
 գրել է Զենոր Սուրէնեանը, որը մանկութեան տարիներից ճանաչել է  
 նրան, յետագայում նրան յիշելով որպէս «լաւ դիւանագէտ, արկածա-  
 խնդիր լրագրող մը»<sup>115</sup>: Ի դէպ, Մալխասունու դուստրը՝ Փարիզի օպե-  
 րայի պարուհի Մարիամ Մալխասունին (Մարիան դը Մալխագունի),  
 1933ին ամուսնացել է Անգլիայի Լիծի դուքս Զոն Ֆրանսիա Օգրորնի  
 հետ: Լիծի դքսական գերդաստանը դէմ է եղել այդ ամուսնութեանը եւ  
 մի քանի ամիս աշխատել է խափանել այն, սակայն Զոն Ֆրանսիան ի  
 վերջոյ կատարել է իր որոշումը<sup>116</sup>:

1910ականներին է գործել հայազգի պետական գործիչ Սմայլ (հաւա-  
 նաբար Իսմայիլ) Զենկիչը, որը ծնուել է Թուրքիայում, պաշտօնավարել՝  
 Սերբիայում: Նրա մահուան առթիւ, 1927ին բանաստեղծ Իւան Ման-  
 ջուրիանիչը գրել է բանաստեղծութիւն<sup>117</sup>:

Արդէն մի քանի անգամ յիշատակուած բժիշկ Յովսէփ Պոյաճեանը  
 (ծն. 1888, Եղեսիա) բժշկական ուսումը ստացել է Կ.Պոլսում եւ ժընե-  
 ւում: 1914ին Ֆրանսիացի բժիշկների հետ մեկնել է Սերբիա՝ որպէս պայ-  
 մանագրեալ բժիշկ բանակի մէջ աշխատելու: Հարաւային Սերբիայի Տե-  
 տոֆօ քաղաքում բարձրացել է բժշկապետի աստիճանի: Նոյն պաշտօնով  
 մեկնել է Բիտոլ, Տիրանա եւ այլ քաղաքներ: Երբ սերրական բանակը  
 քաշուել է Սալոնիկ, Պոյաճեանն էլ մեկնել է այնտեղ եւ 1916ին սերր զին-  
 ուորականների հետ կրակի առաջին գծում է գտնուել: Հակառակ սպայ  
 լինելուն՝ հասարակ զինուորի պէս կռուել է խրամատներում: Պատե-  
 րագմի աւարտից յետոյ հարիւրապետի մնայուն պաշտօն է ստացել հա-  
 րաւսլաւական բանակում: 1922ին գլխաւորել է ի նպաստ հայ որբերի  
 կատարուած հանգանակութիւնը եւ տուել է կարեւոր գումար: 1935ին  
 եղել է Սկոպիէի մեծագոյն զինուորական հիւանդանոցի վարակիչ հի-  
 ւանդութիւնների բաժնի վարիչը՝ փոխզնդապետի աստիճանով: Արժա-

նացել է պատուանշանների եւ մեծ համակրանք վայելել կառավարական շրջանակներում<sup>118</sup> :

Տնտեսագէտ Ջորջ Դաւիդովիչը (George Davidovic, Գէորգ Բաղդասարի Դաւթեան) ծնունդ է 1899ին, Քեմախի Բաղառիճ գիւղում: Փոքր հասակում տեղափոխուել է Սերբիա՝ Հոր մօտ: Ուսանել է ժնեւի Հասարակական եւ Տնտեսագիտական Համալսարանում: Աշխատակցել է շուէյցարական մամուլին: Վերադառնալով Բելգրադ՝ աշխատակցել է տեղական եւ արտասահմանեան թերթերին, աշխատել Բելգրադի Առեւտրական Դպրոցում: 1930ին Դաւիդովիչը հիմնադրել է Բելգրադի Տնտեսագիտական Միութիւնը (1934ից եղել նրա նախագահը), 1931ին՝ *La Vie Economique et Financier* Հարաւսլաւիայի տնտեսագիտական Ֆրանսալիզու հանդէսը եւ նոյնի սերբերէն տարբերակը՝ *Ekonomsko Finanske Zivot*: 1934ին Լայպցիգի միջազգային տնտեսական ցուցահանդէսում ներկայացրել է Հարաւսլաւիան<sup>119</sup> : 1933-1937 նախագահել է Հարաւսլաւիայի «Արտիզինալ» ընկերութիւնը, 1937ից եղել է Հարաւսլաւիայի Միացեալ Համագործակցական Շարժում կազմակերպութեան ընդհանուր քարտուղարը: Մասնակցել է միջազգային համաժողովների Փարիզում, Լահէյում, Քեմբրիջում, Նէապոլում:

Բուլղերիկեան յեղաշրջումից յետոյ ռուսական հայազգի մտաւորականներից ոմանք յայտնուել են Հարաւսլաւիայում: Նրանցից է տնտեսագէտ, գրող, համագործակցական շարժման տեսարան Վահան Տոտովեանցը (1875, Աստրախան-1952, Բելգրադ), որի աշխատութիւնները լոյս են տեսել քսան լիզուներով, նաեւ՝ սերբերէն: 1934ին նա Հարաւսլաւիայում հանդէս է եկել դասախօսութիւններով, Սեպտեմբերին մասնակցել Բելգրադում կայացած Հարաւսլաւական համագումարին<sup>120</sup> : Նա 1937ից մշտական բնակութիւն է հաստատել Բելգրադում<sup>121</sup> :

Ռուսաստանից արտագաղթած հայազգի ճարտարագէտ-նաւաշինարար եւ մեքենագէտ Եակով Մատուէյի Խլիտչիւի (1886, Նոր Նախիջեւան, այժմ՝ Դոնի Ռոստովի մէջ-16.04-1963, Բելգրադ) հայկական անունն էր Յակոբ Մատթէոսի Խլթիչեան, որ գրող Մարիէտա Շահինեանի ազգականն էր: Նա մկրտուել է Նոր Նախիջեւանի հայկական եկեղեցում, 1911ին աւարտել է Պետերբուրգի Պոլիտեխնիկ Ինստիտուտի Նաւաշինական Բաժանմունքը: Նոյն թուականից աշխատել է նոյն ինստիտուտի Շինարարական Մեքենագիտութեան Ամբիոնում եւ Բայթիական Նաւաշինական Գործարանի Կոնստրուկտորական Բիւրոյում: 1918ին Խլիտչիւը մասնակցել է Խերսոնի Պոլիտեխնիկ Ինստիտուտի կազմակերպմանը: 1920ին անցել է Կ.Պոլիս, այնտեղից՝ Բելգրադ, որտեղ աշխա-

տանքի է անցել համայնարանի տեխնիկական բաժնում (1937ից՝ ուսուցչապետ) եւ հարաւսլաւական գիտական մամուլում հանդէս է եկել յօդուածներով: 1955ին նա ընտրուել է Գիտութիւնների եւ Արուեստի Սերբական Ակադեմիայի իսկական անդամ: Խլիտչիւն է կազմակերպել տեսական եւ կիրառական մեքենագիտութեան առաջին երեք համագումարները Հարաւսլաւիայում: Պարգեւատրուել է հարաւսլաւական պետական շքանշաններով<sup>123</sup>:

Կարճ ժամանակով Բելգրադի օպերային թատրոնի գլխաւոր բեմադրիչը եւ տնօրէնն է եղել հայազգի ռուս երգիչ (բարիտոն) եւ օպերային բեմադրիչ Միխայիլ (Միքայէլ) Կարակաշը (1887-1937): 1931ին հաստատուելով Բելգրադում, նա տեղի օպերայում կատարել է մի շարք բեմադրութիւններ, որոնցից նրան մեծ ճանաչում են բերել «Սելիւեան Սափրիչը» (1934) եւ «Իշխան Իգոր»ը (1935): Կարակաշը մահացել է 50 տարեկանում, Բելգրադում (այլ տուեալով՝ Բուխարեստում)<sup>123</sup>:

1931ից ի վեր, մի քանի տարի Սկոպիէում է բնակուել բանասէր, թարգմանիչ, երաժիշտ, տնտեսական գիտութիւնների մագիստրոս Յակոբ-Գրիգորը, որը հայ-հարաւսլաւական մշակութային կապերի ամենաեռանդուն գործիչներից էր: Թէեւ գրադմունքով եղել է մուշտակափաճառ, սակայն նա միաժամանակ ակտիւօրէն թղթակցել է հայ եւ տեղական մամուլին (մասնաւորապէս՝ *Vardar*ին), յետագայում հանդէս է եկել առանձին գրքերով: Նա կազմել է սերբահորվաթերէն-հայերէն գրականի բառարան, որը մնացել է անտիպ<sup>124</sup>:

1931ին Չագրէրի Առեւտրական Բարձրագոյն Ինստիտուտը դոկտորի տիտղոսով աւարտել է Տիրան Ա. Սուքիասեանը, ծնունդով Քեմախի Բագառիճ գիւղից: Նրա դոկտորական թեզն էր «Հայկական Հարցը Մինչեւ ԺԹ. Դարի Վերջը»: Ինստիտուտի դասախօսները բարձր են գնահատել նրա աշխատութիւնը, իսկ Չագրէրի կարեւոր թերթերն այն որակել են որպէս քաղաքագիտական լուրջ աշխատութիւն: Այս առթիւ հայ մամուլին ուղարկած թղթակցութեան մէջ գրուել է. «Մտադրած ենք այս աշխատութիւնը տպել տալ տեղական լեզուով եւ ծրի բաժնել պետական անձնատրութիւններու, ինչպէս նաեւ կարեւոր պաշտօնեաներու: Թէեւ հայ գաղութը փոքրաքիւ է Եուկոսլաւիոյ մէջ, բայց սիրուած է տեղական տարրին կողմէ իբրեւ լուրջ, համեստ, գործունեայ եւ ստեղծագործող ցեղ մը»<sup>125</sup>:

Փարիզարնակ լրագրող-հրապարակախօս Լեւոն Սաւաթեանը 1930ականներին ճանաչուած է եղել որպէս Հարաւսլաւիայի մեծ բարեկամ, *Revue Balcanique* Ֆրանսերէն հանդէսի հրատարակիչը: Հարաւսլա-

իայի մասին Ֆրանսիայում նրա հրատարակած յօդուածները ամէն օր հեռախօսով կամ հեռագրով հաղորդուել են հարաւսլաւական մամուլին, մասնաւորապէս՝ Բելգրադի մեծագոյն եւ կիսապաշտօնական *Vreme* օրաթերթին:

Մակեդոնիայի Հանրապետութեան Գիւղատնտեսութեան փոխնախարարը որոշ ժամանակ եղել է Արթին Յովսէփեանը: Համալսարանի ուսուցչապետ է եղել բժիշկ Լեւոն Մելքոնեանը<sup>126</sup>: Հարաւսլաւական շրջանակներում ճանաչուած է եղել Տիգրան պէյ Չրաճեանը, որը Բ. Աշխարհամարտից յետոյ ընտրուել է Ազգային Պաշտպանութեան Խորհրդարանական Յանձնախմբի ատենապետ ու նաեւ՝ հայ համայնքի ներկայացուցիչը Հարաւսլաւիայի խորհրդարանում<sup>127</sup>:

Վրիժառու Սողոմոն Թեհլերեանը (1896-1960) Բեռլինում Թայէաթ փաշային սպանելուց յետոյ, 1921ին կնոջ՝ Անահիտի հետ հաստատուել է Բելգրադում: Նրա գաւակները ծնուել են Բելգրադում: Սողոմոն Թեհլերեանի որդի Ծահէնը (ծն. 1925) եօթ տարեկանից դաշնամուր է նուագել, յետագայում աւարտել Բելգրադի Երաժշտական Ակադեմիան եւ դասաւանդել քաղաքի տարբեր երաժշտական դպրոցներում: Հանդէս է եկել նաեւ որպէս մենակատար: Երաժիշտ է եղել նաեւ նրա եղբայրը՝ Ջաւէն Թեհլերեանը, որը յետագայում դարձել է Սան Ֆրանսիսկոյի Սիմֆոնիկ Նուագախմբի առաջին ջութակահարը<sup>128</sup>: Թեհլերեանները բնակուել են Բելգրադի Դալմատինսկայա 11 փողոցում, մինչեւ 1951, որից յետոյ հաստատուել են Մարոկում, այնուհետեւ՝ ԱՄՆում<sup>129</sup>:

Հայ-հարաւսլաւական կապերի եւ ականաւոր հարաւսլաւահայերի մասին խօսելիս սխալ կը լինի չլիշատակել Մելանի Խորասանճեանին (1885-1924): Հայի հետ ամուսնացած եւ հայերէնին քաջահմուտ այս սերբուհին (ծնեալ Ժանիէտովիչ) լիովին նուիրուել է իր ամուսնու ժողովրդին, իր իսկ խօսքերով՝ «հերոս հայ ցեղին»: Մեծ յարգանք վայելելով հայկական, սերբական, բելգիական, իտալական եւ Ֆրանսիական շրջանակներում՝ Մելանի Խորասանճեանը Առաջին Համաշխարհային Պատերազմի տարիներին նուիրուել է հայ գինուորների խնամքի գործին, Լոնդոնում կազմակերպել օգնութիւն՝ յանուն հայ որբերի, եղել Հայ Տիկնանց Աշխատանոցի եռանդուն գործիչներից: Այնուհետեւ նուիրուել է եւրոպական ժողովուրդների մէջ հայութեանը ներկայացնելու գործին՝ նպատակ ունենալով յատկապէս՝ հայ արուեստի միջոցով հային ճանաչել տալ օտարներին: Բազմիցս հանդէս է եկել հայանպաստ բանախօսութիւններով, հայութեան շահերը ներկայացրել Ա. Աշխարհամարտից յետոյ ժնեւի Միջազգային Համագումարում: Մելանի Խորասանճեանի

ջանքերով է հիմնուել Բելգիայի «Արմենիա» միութիւնը: Նա քաջալերել է հայ բեմի դերասանուհի էլիզ Գովանին (Պիննեմէճեան) Փարիզում հայկական թատերախումբ հիմնելու: Այս եռանդուն սերրուհու անժամանակ մահը Բրիւսէլում, 39 տարեկանում, մեծ կորուստ է եղել հայ ժողովրդի եւ յատկապէս հայ արուեստագէտների համար<sup>130</sup>:

### ՀԱՅ-ՍԵՐՐԱԿԱՆ ՄՇԱԿՈՒԹԱՅԻՆ ԿԱՊԵՐԸ 1910-1930ԱԿԱՆՆԵՐԻՆ

Արդէն 1911ին սերբ գրականութեան որոշ նմոշներ հայերէն են թարգմանուել բնագրից: Պոլսի Ազատամարտ շարաթաթերթի յաւելուածում յոյս է տեսել Բոր. Միրկոպիչի «Կեանքին Ընդմէջէն» բանաստեղծութիւնը՝ Չենոբ Սուրէնեանի թարգմանութեամբ<sup>131</sup>: Վերջինս Եղեռնի գոհ բանաստեղծ Արմէն Տորեանի (Հրաչեայ Սուրէնեան) եղբայրն էր: Սերբերէնի նրա իմացութիւնը բացատրուում է այն հանգամանքով, որ Սուրէնեան եղբայրները ծնուել են Սկոպիէում:

Փարիզարնակ բանասէր Մ. Ս. Դաւիթ Բէկը (Մարտիրոս Սարգսեան, 1870-1938) հրատարակել է քերականութիւններ եւ գրուցատրութիւններ տարբեր լեզուներով, նաեւ՝ սերբերէն:

Հայ-սերբական գրական կապերի մասին խօսելիս նախեւառաջ յիշուում է Յովհաննէս Թումանեանը, որը 1915ից սկսած ռուսերէնից թարգմանել է սերբական դիւցազնավէպի մի քանի չափածոյ հատուածներ՝ «Թէ Ինչ Ուղարկեց Թուրքի Սուլթանը Մոսկովի Յարի Ընծաների Փոխարէն», «Մարկոն Ռամագանին Գինի է Խմում», «Մարկոն Վերացնում է Պսակի Հարկը» եւ «Մարկոն Վար է Անում»: Առաջին վիպերգում, ըստ գրականագէտների, Թումանեանը տեսել է թուրքական լծից քրիստոնեայ ազգերի ազատագրման գործում Ռուսաստանի պատմական դերի հաստատումը, իսկ երկրորդ գրաւչութիւնը հայ բանաստեղծի համար մեծացել է նրանով, որ քրիստոնեայ պատրիարքի՝ «արդար ծերունու» կերպարն իր մարդասիրութեամբ եւ անձնագոհութեամբ յիշեցնում է Թումանեանի «Աղաւնու Վանքը» ստեղծագործութեան ծերուկ հայր Օհանին<sup>132</sup>: Յատկանշական է, որ Թումանեանը ծանօթագրել է որոշ անուններ, օրինակ, «Կոսովի դաշտը» նա համարել է «սերբական Աւարայրը», նմանութիւններ տեսել արքայազն Մարկոյի եւ Սասունցի Դաւիթի կերպարների միջեւ<sup>133</sup>: Թումանեանը 1916ին գրել է նաեւ «Մի Երկու Խօսք Սերբ Ժողովրդական Էպոսի Մասին» յօդուածը<sup>134</sup>:

Աւետիք Իսահակեանի «Ժողովրդի Քնարը (Սերբական Լեզենդ 18րդ Դարի)» վիպերգը մի պատկեր է՝ սերբ ժողովրդի թուրքական տիրապետութեան ժամանակաշրջանից, այն ժամանակ, երբ «Փայլատակում էր

եաթաղանը կեռ/ Արիւնաթաթախ Սերբիայի վրայ»։ Վիպերգում խնջոյք է անում «Արդուլլահ փաշան, Սերբիայի դահիճ/ Դերմակ Բելգրադի պերճ ապարանքում»<sup>135</sup>։ Նա հրամայում է իր մօտ կանչել ծեր գուսլեար Մարկոյին՝ հրամայելով իր գործիքով փառարանել իրեն։ Դրա դիմաց փաշան խոստանում է ազատել Մարկոյի չորս գերեզարուած որդիներին։ Մակայն ծեր գուսլեարը չի կարողանում իրեն կեղծել։ Նա ջարդում է իր գործիքը, ասելով, որ «ժողովրդի քնարը չի կարող ստել»։

Սերբիան թուրքիկ յիշուած է Ռուբէն Սեւակի «Ճամբորդութիւն» արձակ գործում (1906), երբ երիտասարդ գրագէտը շոգեկառքով ուսման է մեկնելիս եղել Շվեյցարիա։ «Այս գիշեր ուժգին երաժշտութիւն մը կ'արթնցնէ զիս ընդստ։ Սերպիոյ Փիրոս կայարանին առջեւ կեցած ենք։ Չիւնը ծածկեր էր գետինները ճերմակ, ճեփ-ճերմակ։ Չիւներուն վրայ Սերպիոյ աշխոյժ քամի մ'է որ կը պարէ գուարթօրէն. երաժիշտները իրենց ձայնին բոլոր ուժգնութեամբը կ'երգեն իրենց տոհմիկ երգերը։ Մարդ պէտք չունի անոնց լեզուն գիտնալու՝ գմայլելու համար այդ սրտայոյզ երգերէն։ Ու տխրագին աղաղակներ կը թնդան օդին մէջ, ու գեղջուկ երգեր կը ցնցեն սրտերը, ու ջութակներ կը հեծեն գիշերին մէջ... Ու կը յառաջանանք միշտ։ ...Ու ահա՛ լոյսը, ահա՛ տունի ստուերները, ու ահա՛ կայարանն ալ։ Պելկրատ ենք»<sup>136</sup>։

Սերբ գրականութեան այլեւայլ նմոյշներ լոյս են տեսել նաեւ 1920ականների հայ մամուլում<sup>137</sup>։ 1939ին հայ մամուլում Յակոբ-Գրիգորի արձակ թարգմանութեամբ լոյս է տեսել սերբական ազգային «Դուշան կայսեր Ամուսնութիւնն ու Մահը» դիւցազներգութիւնը։ «Հայեւերբ քարեկամութեան առաջին սանդղիւր թող ըլլայ այս փորձս, որուն անշուշտ ուրիշներ պիտի յաջորդեն», գրել է թարգմանիչը<sup>138</sup>։ Ի դէպ, այս առթիւ Բելգրադի Vreme օրաթերթում ճանաչուած երիտասարդ հրապարակախօս Տոդոր Մանելիչը (Todor Manević) 1935ի Օգոստոսի 11ի թւում ստորագրել է յօդուած հայ ազգի գրական կարողութիւնների մասին։ Իր խօսքը սկսելով Յակոբ-Գրիգորի՝ սերբական դիւցազներգութեան թարգմանութեան յիշատակամբ, նա նշել է, որ հայերը շատ տարիներ առաջ թարգմանել են գրեթէ բոլոր քաղաքակիրթ ազգերի դիւցազներգութիւնները եւ Շեքսպիրի գործերը՝ յիշելով հայ թարգմանիչներ Արսէն Ղազիկեանի, Մատթէոս Մամուրեանի եւ Յովհաննէս Մասեհեանի անունները<sup>139</sup>։

1936ին Բելգրադում լոյս է տեսել Ֆրանց Վերֆէլի Մուսա Լերան 40 Օրերը վէպի սերբահորվաթերէն թարգմանութիւնը՝ երկու մեծ հատորով եւ «Հայերի Մեծ Վէպը» ենթախորագրով<sup>140</sup>։ Հարաւսլաւական մա-

մուլը, մասնաւորապէս Սկոպիէի Vardarը եւ Skopski Glasnikը (Սկոպիէի լրագրեր) ջերմ տողերով ողջունել են գրքի հրատարակումը<sup>141</sup>: 1930ականներին Բելգրադում ելոյթ է ունեցել նշանաւոր հայ նուագաձու Բեմանչիստ Ռուբէնը (Գարախանեան, 1895-1983): Ի դէպ, Ռուբէնին Բելգրադի թուրք հիւպատոսը սխալմամբ դրել է յեղափոխական գործիչ Ռուբէն Տէր Մինասեանի տեղը եւ ձերբակալել է տուել, որից նա ազատուել է Սողոմոն Թեհլերեանի եւ Բելգրադի հայոց քահանայի ջանքերի շնորհիւ<sup>142</sup>:

Եղել են կապեր նաեւ արուեստի ասպարէզում: Որոշ ժամանակ Բելգրադում է գործել երաժիշտ Լեւոն Եղիազարեանը (1870ականներ, Շամախի-1927, Բրաշով, Ռումինիա), գրող Կոստան Ջարեանի համահայր եղբայրը: 1925ի Փետրուարի Զին Բելգրադի թատրոններից մէկում նրա ղեկավարութեամբ կայացել է տեղի Ստանկովիչ երգչախմբի համերգը: Բացառապէս սերբերից կազմուած այս երգչախմբին հայ երաժիշտն ուսուցանել է հայ ժողովրդական երգեր, եւ խումբը յաջողութեամբ կատարել է «Իմ Զինարի Եարը», «Կռունկ», «Ինջիլիք» եւ այլ երգեր, որոնք մեծ հետաքրքրութիւն են առաջացրել: Արտասանուել են Արշակ Չօպանեանի La Roseaie d'Armenie ժողովածուի բանաստեղծութիւններից՝ սերբերէն թարգմանութեամբ<sup>143</sup>: Երեկոյթին մասնակցել են Սերբիայի լաւագոյն դերասաններ, ինչպէս նաեւ հայ երգչուհի Բորովեանը, որ կատարել է «Անտունի», «Երագ» եւ «Արի իմ Սոխակ» երգերը: Համերգից յետոյ Սերբիայի խորհրդարանի նախագահ Լուրա Իււանովիչը եւ իր տիկինը իրենց օթեակն են հրաւիրել Եղիազարեանին եւ շնորհակալութիւն յայտնել համերգի համար<sup>144</sup>: Այս համերգին, սակայն, անդրադարձել է ընդամէնը մէկ սերբական թերթ<sup>145</sup>:

1935ին Սկոպիէի պետական թատրոնում կայացել է քաղաքի երաժշտական վարժարանի ուսանող, «Վարդար» մեծ երգչախմբի անդամ Յարութիւն Ղազարոսի Սիւրմէեանի (բանասէր, հոգեւորական Արտաւազդ Սիւրմէեանի եղբորորդին) մենահամերգը, որի ընթացքում նա հանդէս է եկել հայկական եւ հարաւսլաւական երգերի կատարումներով<sup>146</sup>: 1937ին, նա մեծ յաջողութեամբ հանդէս է եկել Մասկանիի «Գեղջկական Ասպետութիւն» օպերայի բեմադրութեան մէջ: Բ. Աշխարհամարտից յետոյ Սիւրմէեանը երկար տարիներ եղել է Սկոպիէի Մակեդոնական Ազգային Օպերայի մեներգիչ, հանդէս եկել դասական եւ հարաւսլաւական երկու տասնեակի հասնող օպերային բեմադրութիւններում՝ մեծ յաջողութիւններ արձանագրելով Հարաւսլաւիայի քաղաք-

ներում<sup>147</sup>։ Նա մեծապէս նպաստել է մակեդոնական երաժշտական մշակոյթի զարգացմանը։

Հարաւսլաւիայի հայ երաժիշտներից են նաեւ 1935ից Բելգրադում բնակուած դաշնակահարուհի Ուսաննա Տէրտէրեանը (ծն. 1912, Քեմախ), ինչպէս նաեւ 1932ին Բելգրադում ծնուած դաշնակահարուհի էւրիցա Բադդասարեանը եւ 1937ին Սուբոտիցայում ծնուած երգչուհի Ալմաստ Պետրոսեանը<sup>148</sup>։

Գերասան Վահրամ Փափագեանի վկայութեամբ՝ մինչեւ Ա. Համաշխարհային Պատերազմը Կ. Պոլիս է եկել բոսնիացի մեծահարուստ Ռիզա Ռուհին Սարայեւոյից։ Նա կազմակերպել է հայկական ուժերով Շեքսպիրի Համլէտի բեմադրութիւնը եւ Ֆինանսաւորել ամբողջ գործը։ Ներկայացման բեմադրիչը եղել է Վահրամ Փափագեանը։ Ռիզա Ռուհին ներկայացումից մէկ ժամ առաջ յայտարարել է, որ ինքը պէտք է մայրենի լեզուով խաղայ Կլաւդիոսի դերը, որը ո՛չ երբեւէ փորձել էր, ո՛չ էլ տեքստին էր ծանօթ։ Հայ դերասանները չեն ցանկացել մերժել իրենց երկու ամիս հովանաւորած առատաձեռն օտարերկրացուն։ Սակայն Փափագեանի հօրաքոյրը, որը նոյն ներկայացման մէջ Գերտրուդի դերակատարուհին էր, փրկել է դրութիւնը։ Նա «այդ գիշեր խաղաց թագաւորն ու թագուհին «մի մարմին դարձած», թոյլ չտալով խելագար բոսնիացուն որպէս նմոյշ արտասանել գոնէ մի վանկ խորվաթական դպրութիւնից։ Այդ ներկայացումից քիչ յետոյ Ռիզա Ռուհին հեռացաւ մեզանից Սարայեւօ, իր ծննդավայրը, տանելով իր հետ իբր ամուսին մի սիրուն աղջկայ, սկիւտարցի մի համեստ հայ ընտանիքից, օրիորդ Բլոնդին անունով, անբաւ հարստութիւն թողնելով մեր թատրոնին եւ մի քանկագին մատանի՝ ինձ, որպէս յիշատակ»<sup>149</sup>։ Տեղին է նշել, որ իր Յետադարձ Հայեացք յուշագրութեան վերջում իր այցելած քաղաքները թուարկելիս Փափագեանը յիշել է նաեւ երեք հարաւսլաւական քաղաք՝ Նիշ, Բելգրադ եւ Զագրէբ<sup>150</sup>։

Դարձեալ Յակոբ-Գրիգորի վկայութեամբ՝ 1936ին Հարաւսլաւիայում մեծ յաջողութիւն է ունեցել հայ անդրանիկ հնչուն շարժանկարը՝ Համօ Բեկնազարեանի «Պեպօ»ն։ «Մեր քաղաքին մէջ չգիտցող չմնաց։ Թերթերը օրեր առաջ իրենց սիւնակներուն մէջ այս չորս գիրերը տարածեցին, եւ ժողովուրդը յուսախաբ չեղաւ։ Գնաց, գնաց բազմութիւնով, եւ լսեց իրեն համար նոր լեզու մը, ոսկեղէն լեզու մը։ Ինչպէս իմացայ, Սլովենիոյ քաղաքակիրթ մայրաքաղաքին՝ Լուբլանայի մէջ, ՊԵՊՕն տարեր է ողիմպիական յաղթանակ մը։ Եւ ֆիլմը «վագեր» է այդ քաղաքի թատրոններուն մէջ՝ ա՛յնքան երկար, որ մենք ստիպ-

ուած պիտի կոչենք այդ՝ «Պետպոլի մարտարմեան վագրը Լորիստայի մէջ»<sup>151</sup>։

Ամփոփելով կարող ենք նշել, որ Հայ-Հարաւորական կապերը, թէ՛ եւ սակաւ եւ պատահական, ինքնին ուշագրաւ են՝ հանդիսանալով Եւրոպայում Հայոց ներկայութեան խճանկարի մի գոյնը։ Հարաւորաբար Հայութիւնը եղել է Բալկանեան Թերակղզու տիպար գաղութ, որն իր սակաւութեան եւ ազգային կեանքի անկազմակերպութեան պատճառով դատապարտուած էր եղել արագ ձուլման եւ անհետացման<sup>152</sup>, թէ՛ եւ այսօր էլ Հարաւորակահայերից շատերի մէջ վառ է մնում ազգային սպին եւ համախմբուելու ջանքեր են գործադրուում։

## ԾԱՆՕԹԱԳՐՈՒԹՅՈՒՆՆԵՐ

<sup>1</sup> Այս երկրի անունը Ի. դարի արեւմտահայ մամուլում տրուել է Թարգմանարայ Սեւ-Լեռ կամ Սեւ-Լեռնեան կառավարութիւն անուններով («Պետական կեանք», *Արտատարատ*, 18-06-1.07.1911)։

<sup>2</sup> Անգամ մեր օրերում գուգահեռներ են անցկացւում Դարարայի եւ կոստանի հիմնախնդիրների միջեւ (Ստեփան Պօղոսեան, «Սերպիս եւ Հարաստան, Փոստին եւ Արցախ», *Յաւաջ*, 7/8.07.2007)։

<sup>3</sup> Մինչեւ անգամ յայտնի են դէպքեր, երբ Հայերին եւ սերբերին թիրախացարայ ետնացրել են։ Այսպէս, երբ 1917ին Մարտչում նշել են Մառնի հակառակարար կրթարդ տարելիցը, հանդիսութեան ժամանակ Հայերին սխալմամբ սերբ են կոչել։ Այս առթիւ ժամանակակիցը գրել է. «Իրանաան աշխարհի յարաբաղմ ազգերն ըսարոյ կամ դերձ, դեռ հասարակ ժողովուրդը քոլորովին տգեալ եւ անմասնօր է Հայերու ու Հայաստանին, անոնք կը շփոթեն մեզ յանախ Սերպերու եւ Սիւրիայիներու հետ» (Արթուր, «Մառնի Յաղթական Ըակաստամարարի 3րդ Տարեդարձը եւ Մ. Հ. Յ. Միութիւնը», *Վերածնունդ*, 17-10.1917, էջ 120)։

<sup>4</sup> Hagop-Krikor, *Les Arméniens Connus et Inconnus*, Փարիզ, 1974, էջ 100-107, նաեւ՝ Սակար-Գրիգոր, *Նրկերու Հաւարածոյ*, Փարիզ, 1981, էջ 300-324։

<sup>5</sup> Հայտնաբերական առնչութիւնների վերաբերեալ նրա յոգուածները տե՛ս՝ կրա հայերի եւ սերբերէն ժամանակագրութեան մէջ (Քարկէն Միսնեան, *Մասնագրութեան մասին*, Ստեփան, «Գիրք» Հրատարակչութիւն, 2002)։

<sup>6</sup> Վ. Գ., «Հայերը» Գրքի Ենթահանդէսը Պեկրատում», *Սփիւռք Յանուար-Մարտ*, 2000, № 1-3, էջ 8։

<sup>7</sup> Հրաչեայ Աճառեան, *Հայ Գաղթականութեան Պատմութիւն*, Երեւան, «Յակոբ-Մէլ», 2002, էջ 280, նաեւ՝ Ալեք Յովակիմեան, «Հարաւորաբար», *Հայ Յիշատակ* շաբաթաթերթում, Երեւան, «Հայկական Հանրագիտարան» Հրատարակչութիւն, 2009, էջ 202-203։ Ա. Յ. Մակարեանի *Յուշագիրք Թրակիայ եւ Մակեդոնիայ Հայ Յաղթածներու արձագանք* հատորը (Մեղակի, «Հորիզոն», 1978) վերաբերում է յաւանքի ժողովուրդին։ Հայ-Հարաւորական կապերին անդրադարձել է նաեւ Կոստանուպէլի Յրաբնաբանը սփրդքական կրթչտական մշակութիւն կուրսում իր՝ Հայ Կոստանուպէան Մշակութի Աշխարհագրութիւն Ընկերակերը հասարակ (Երեւան, 1984) իր տարակարգութիւն, 1984, էջ 22/23։

<sup>8</sup> Մենք կը փորձենք կատարել առաջին գործնական քայլը սոյն թեմայի ակադեմիական ուսումնասիրութեան մէջ՝ նրա ամենալայն ընդգրկմամբ հետազոտումը թողնելով նախկին Հարաւսլաւիայի ժողովուրդների լեզուների գիտակ մի մասնագէտի, որը հնարաւորութիւն կ'ունենայ պրպտումներ կատարել հարաւսլաւական, ինչպէս նաեւ եւրոպական այլ երկրների գիւաններում (մասնաւորապէս՝ Վիեննայի Մխիթարեան Միաբանութեան արխիւներում, որտեղ արժէքաւոր նիւթեր կան յատկապէս Սերբիայի հայութեան վերաբերեալ):

<sup>9</sup> Յակոբ-Գրիգոր, «Սերպ Մամուլը եւ Հայերը», Ապագայ, 12.03.1935:

<sup>10</sup> Սուրէն, «Սերպահայ Կեանքէն», Ապագայ, 14.04.1925:

<sup>11</sup> Յակոբ-Գրիգորը, առանց որեւէ պատմական սկզբնաղբիւրի վկայակոչման, որպէս հայորդի է յիշել ԺԴ-ԺԵ դարերում գործած Սերբիայի առաջին եպիսկոպոս Յամբլակին (Tzambalak) (Hagop-Krikor, *Les Arméniens*, էջ 106), «...Թուրքին դէմ կռուելու հասարակաց քաղաքականութիւնը Պալքանեան թերակղզին նետած է շարք մը Հայեր, որոնք ճակատագրական դեր խաղացած են Երոսլայի այս մասին մէջ ալ: Ամենէն շատ կարեւորութիւն տուցած Հայր եղած է Չանպակ կամ Չանպակ արքեպիսկոպոսը, որ ոչ միայն եղած է Սերպերու առաջին պատրիարքը, այլ նաեւ նախկին Բեքրոկրատի ալ առաջնորդ՝ Ռուսերու համար: Ատկէ գատ Չանպակ իր պատուոյ տեղն ունի եռկուսլաւ գրականութեան մէջ» (Յակոբ-Գրիգոր, «Հայ-Եսկոպալ Յարաբերութիւններ», Հայաստանի Կոչնակ, 26.09.1935, էջ 928): Սա բացարձակ սխալ է, քանի որ այդ գործիչը ապրել է ԺԴ-ԺԵ դարերում, իսկ Պետրոզրազը հիմնուել է ԺԸ դարում: Գրիգորի Յամբլակը (1364-1420) որոշակի դեր է կատարել Ռուսիայի, Սերբիայի, Մոլդաւիայի եւ Լիտուանի հոգեւոր կեանքում: Նա կրթութիւնն ստացել է Բիւզանդիայում՝ Աթոնի վանքում, աշակերտել նշանաւոր բիւզանդացի աստուածաբանների եւ գիւանականների եւ ազգութեամբ եղել է սերբ:

<sup>12</sup> O. Kh. Khalpakhchyan, *K Voprosu ob Armiano-Serbskikh Kulturnikh Sviazakh* (Հայ-սերբական մշակութային կապերի հարցի շուրջ), Պատմաբանասիրական Հանդէս, 1971, թ. 2, էջ 259-262, նաեւ՝ Հ. Մ. Բարթիկեան, «Հայերէն Երկու Վիմագիր Արձանագրութիւն Հարաւսլաւիայում», Պատմաբանասիրական Հանդէս, 1990, թ. 3, էջ 127-130:

<sup>13</sup> Բարթիկեան, էջ 130:

<sup>14</sup> <http://en.wikipedia.org/wiki/Jermenovci> :Ըստ այս նոյն աղբիւրի՝ 2002ին այս գիւղն ունեցել է 1033 բնակիչ, մեծ մասամբ հունգարացիներ: Յակոբ-Գրիգորն այդ գիւղը միշտ է վրչաց քաղաքի մօտ՝ Արմենովաց կամ Էրմենովաց անունով (Hagop-Krikor, *Les Arméniens*, էջ 107): Այս բնակավայրի մասին մանրամասն տես՝ Bodog Milleker, *Űrményháza Története, 1817-1906* (Արմենովացի պատմութիւնը, 1817-1906), 1906 Vrsac:

<sup>15</sup> Պ. Մ., «Օտար Կարծիքներ Հայ Արուեստին մասին», Նաւասարդ, Բ. շրջան, Պուքրէշ, 1925, էջ 168:

<sup>16</sup> Armand Thouhadjian, *Saint Blaise Evêque de Sébaste, Arménie Mineure, Saint du IVe Siècle Universel et Populaire*, Paris, L'Harmattan, 2004, էջ 259-263: Ծրանսահայ հեղինակը մանրակրկիտ հետազոտել է Վրասի մասին, սակայն նրան անմատչելի են եղել այս սրբի վերաբերեալ հայերէն աղբիւրները (օրինակ, Մ. Աւգերեան, Մաղիկ Վարուց Մրրոց, Չորս կը Տօնէ Եկեղեցի Հայաստանեայց, Վենետիկ, 1803, նաեւ՝ Կ. Յ. Բասմաջեան, «Սուրբ Վրաս կամ Վրաս», Հայաստանի Կոչնակ, 1932, թ. 42, էջ 1054-1055):

<sup>17</sup> Thouhadjian, էջ 355, 363:

- <sup>18</sup> G. L. Karagezyan, *Armenia i Armyane vo Francuzskoy Literature XI-XIV vekov* (Հայաստանը եւ Հայերը ժԱ.-ժԴ. դարերի Ֆրանսիական գրականութեան մէջ), Երևան, Հայկական ՍՍՀ ԳԱ Հրատարակչութիւն, 1988, էջ 27.
- <sup>19</sup> Գրիգոր Տղայ, *Բանաստեղծութիւններ եւ Պոէմներ*, աշխատասիրութեամբ Ասատուր Մնացականեանի, Երևան, ՀՍՍՀ ԳԱ Հրատարակչութիւն, 1972, էջ 268.
- <sup>20</sup> Բարկէն Սիմոնեան, «Հայկական Նորայայտ Յուշարձան Սերբիայում. Երմենչիչ», *Ազգ.* 23.07.1992.
- <sup>21</sup> Յովակիմեան, «Հարաւսրաւիա», էջ 353.
- <sup>22</sup> Vahan Totomianz, *Le Rôle des Arméniens dans la Civilisation Mondiale*, Belgrade, 1938, էջ 59.
- <sup>23</sup> Ժամանակագրութիւն Գրիգոր Վարդապետի Կամարսեցւոյ կամ Դարանաղցւոյ, հրատարակեց Մեսրոպ Վրդ. Նշանեան, Տպարան Առաք. Աթոռոյ Ս. Յակոբեանց, Երուսաղէմ, 1915, էջ 18.
- <sup>24</sup> Նոյն, էջ 69.
- <sup>25</sup> Յովակիմեան, «Հարաւսրաւիա», էջ 355.
- <sup>26</sup> Սիմէոն Լեւոնցի, *Ուղեգրութիւն, Թարգմանութիւններ, առաջաբանը եւ ծանօթագրութիւնները Արշակ Մաղոյեանի*, Երևան, «Նայիրի» Հրատարակչութիւն, 1997, էջ 40.
- <sup>27</sup> Նոյն, էջ 41.
- <sup>28</sup> *Ուշ Միջնադարի Հայ Բանաստեղծութիւնը (XVI-XVII դդ.)*, Հտր. 2, Երևան, ՀՍՍՀ ԳԱ Հրատարակչութիւն, 1987, էջ 311.
- <sup>29</sup> Հրաչեայ Աճառեան, *Յուշակ Հայերէն Զեռագրաց Թաւրիցի, Վիեննա, Մխիթարեան*, 1910, էջ 115.
- <sup>30</sup> *Մանր Ժամանակագրութիւններ, XIII-XVIII դդ.*, Հտր. 1, կազմեց Վազգէն Յակոբեան, Երևան, Հայկ. ԽՍՄ Գիտութիւնների Ակադեմիայի Հրատարակչութիւն, 1956, էջ 283.
- <sup>31</sup> Յակոբոս Տաշեան, *Յուշակ Հայերէն Զեռագրաց Կայսերական Մատենադարանին Ի Վիեննա, Վիեննա, Մխիթարեան*, 1891, էջ 31, նաեւ՝ Արշակ Ալլոյոյանեան, *Պատմութիւն Եւզոպիոյ Հայոց, Գահիրէ, «Նոր Աստղ»*, 1952, էջ 1059, նաեւ՝ *Մանր Ժամանակագրութիւններ*, էջ 404.
- <sup>32</sup> Տաշեան, նաեւ՝ *Մանր Ժամանակագրութիւններ*, էջ 405.
- <sup>33</sup> Տաշեան, նաեւ՝ *Մանր Ժամանակագրութիւններ*, էջ 405-406.
- <sup>34</sup> *Յուշակ Զեռագրաց որ ի Հանդէս Ամսօրեայ, խմբ. Հ. Հ. Ոսկեան, Վիեննա, Տպ. Մխիթարեան*, 1976, էջ 40.
- <sup>35</sup> Ալլոյոյանեան, *Պատմութիւն Եւզոպիոյ*, էջ 339.
- <sup>36</sup> Sirarpie Der Nersessian, *Armenian Manuscripts in the Walters Art Gallery*, Baltimore, 1973, էջ 91: Հետաքրքիր է, որ Սիրարփի Տէր-Ներսէսեանը յիշատակարանի անգլերէն թարգմանութեան մէջ այնպէս է գրել, որ կարծես «Երէց» եղել է գրչի անունը ("...written by the hand of Erets of Peligrat (Belgrade?), at Constantinople in the year of the Armenians 1127 (AD 1678)," նոյն տեղում, էջ 76), մինչ բնագրից պարզ է, որ գրչը եղել է երէց Յակոբը: Ինչպէս տեսնում ենք, Տէր-Ներսէսեանը նաեւ վստահ չէ, թէ յիշատակարանում նշուած Պելիգրատը նոյն Բելիգրադն է, ինչը, սակայն, կասկածից վեր է: Ի դէպ, տեղանունների ցանկում ո՛չ Peligrat եւ ո՛չ էլ Belgrade կայ:
- <sup>37</sup> Ewa Balicka-Witakowska, "En Armenisk Magisk Rulle i Uppsala Universitetsbibliotek" (*Մի Հայկական Հմայիլ Ուփսալայի Համալսարանի գրադարանում*), *Bysantiska Sällskapet Bulletin*, Uppsala, 1997, no 15, էջ 31-32.

<sup>38</sup> Բարկէն Միմոնեան, «Բելգրադի Հայկական Արձանագրութիւնները», *Աստուած*, 1997, թ. 19:

<sup>39</sup> Նոյն:

<sup>40</sup> Նոյն:

<sup>41</sup> Արպոյաճեան, *Պատմութիւն Եւրոպայ*, էջ 339:

<sup>42</sup> Հայ Սփիւռք Հանրագրտարան, էջ 355:

<sup>43</sup> «Եուկոսուրաւիոյ Հայ Եկեղեցին Պիտի Փլցուի», *Ասպարէզ*, 8.05.1964: Այստեղ նշուած է, որ եկեղեցուն կից գերեզմանատանը կայ ընդամէնը մէկ Հայի շիրիմ՝ եկեղեցին կառուցողինը (նկատի ունի Ճանազիզեան գերդաստանի մահարձանը): Հետաքրքիր ելցաւալի գուգադիպութիւն է, որ Ի. դարի 60ականներին Հայ եկեղեցական շինութիւններ են քանդուել աշխարհի տարբեր երկրներում: 1962ին՝ Ջակարտայում (Ինդոնեզիա), 1964ին՝ Նովի Սադում (Հարաւսլաւիա), 1966ին՝ Խարբինում (Չինաստան): Վերջին երկու իրողութիւնները կապուած են այդ երկրներում Հաստատուած Համայնավարական կարգերի ունեցած Հակաեկեղեցական քաղաքականութեան հետ:

<sup>44</sup> Արպոյաճեան, *Պատմութիւն Եւրոպայ*, էջ 354-355:

<sup>45</sup> [http://en.wikipedia.org/wiki/Novi\\_Sad](http://en.wikipedia.org/wiki/Novi_Sad)

<sup>46</sup> Հայ Սփիւռք Հանրագրտարան, էջ 355:

<sup>47</sup> Յովակիմեան, «Հարաւսլաւիա», էջ 354:

<sup>48</sup> Todor-Munkája Avramowics, *Njemeckij i Szerbszkij Slovare* (Գերմաներէն եւ սերբերէն բառարաններ), Bécs, 1790:

<sup>49</sup> Յովհաննէս Կամենացի, *Պատմութիւն Պատերազմին Խոթինու*, աշխատասիրութեամբ Յ. Ս. Անասեանի, Երևան, Հայկ. ԽՍՌ Գիտութիւնների Ակադեմիա, 1964, էջ 59, 62: Ժամանակակից Հայ հեղինակի գնահատմամբ, «Օսմանեան բարիքներն» մին ալ եղած է բնակչութեան մէկ մասի բռնի իսլամացումը. եղած են նաեւ կամատր կրօնափոխութիւններ, քանի Օսմանեան Կայսրութեան մէջ Մարգարէին հաւատացողը - ինչ ազգութեան ալ պատկանէր - մաս կը կազմէր արտօսեալ խալիս, մինչ կեատր մնացածը ենթակայ էր ամէն նուաստացումի... Այսպէս ստեղծուեցաւ Պոսնիա կամ Պոչնաք «ազգութիւնը» ethnien, որը մինչեւ օրս կը թունատրէ շրջանի խաղաղութիւնն ու անդորրը» (Ստեփան Պօղոսեան, «Սերպիա եւ Հայաստան»): Այս «թունաւորել» բնորոշումը վերաբերում է ոչ միայն տարածաշրջանում 1990ականների խժըր-ժութիւններին, այլ նաեւ աւելի վաղ իրադարձութիւններին, օրինակ, յայտնի «Սարալեույի սպանութեանը», երբ 1914ին Սարալեույում աւտրիացի էրցհերցոգ Ֆրանց Ֆերդինանդի սպանութիւնը առիթ հանդիսացաւ Ա. Աշխարհամարտին: Ի դէպ, Հայկական Սովետական Հանրագրտարանում Բոսնիա-Հերցեգովինայի բնակիչները նշուած չեն որպէս բոսնիացիներ, այլ՝ «սլաւոն-մուսուլմաններ» (Հար. 2, Երևան, Հայկական ՍՍՀ Գիտութիւններու Ակադեմիայի Հրատարակչութիւն, 1976, էջ 521):

<sup>50</sup> Աշոտ Յովակիմեան, «Վուկ Կարաջիչը եւ Հայերը. Վուկ Ստեֆանովիչ Կարաջիչի 200ամեակը», *Կուլտուր-Լուսաւորչական Աշխատանք*, 1988, թ. 3-4, էջ 72-79:

<sup>51</sup> Նոյն, էջ 73: Կարաջիչի մասին տե՛ս նաեւ՝ Արեւելացի, «Վեթերանի մը Տան Բացումը», *Արեւելք*, 7-12-1933:

<sup>52</sup> Hagop-Krikor, *Les Arméniens*, էջ 106:

<sup>53</sup> [http://en.wikipedia.org/wiki/Petar\\_II\\_Petrovi%C4%87-Njego%C5%A1](http://en.wikipedia.org/wiki/Petar_II_Petrovi%C4%87-Njego%C5%A1)

<sup>54</sup> Hagop-Krikor, *Les Arméniens*, էջ 106:

- <sup>65</sup> Այս մասին մանրամասն տե՛ս՝ Զեյիքո Մովսիսեան, *Եւրոպական Ազգային-Ազատագրական Շարժումները Հայ Պարբերական Մամուլում, 1848-1852*, Երևան, «Վան Արեան», 2004, էջ 612-627:
- <sup>66</sup> «Արտաքին Տեսութիւն. Սլափօնական Երկիրներ. Բօսնիա», *Արժագանք*, 27.06.1882, էջ 290:
- <sup>67</sup> *Ջիւանու Քնարը*, կազմեց Աղասի Սահակեանը, Երևան, «Հայպետհրատ», 1958, էջ 770-771:
- <sup>68</sup> Ե. Պատկանեան, «Հայերը Սերբիայում», *Լոյս Օրացոյց*, Նոր Նախըջեան, 1905, էջ 171-172:
- <sup>69</sup> Յովակիմեան, «Հարաւսլաւիա», էջ 355:
- <sup>70</sup> Աճառեան, *Հայ Գաղթականութեան Պատմութիւն*, էջ 680:
- <sup>71</sup> Վարդգէս Վ. Սայրասուր, «Հին Յիշատակներէս», *Պայքար*, 16.03.1927:
- <sup>72</sup> Արիս Ծեսճեան, «Իմ Յիշատակներէս», *Արագ*, 14.12.1935:
- <sup>73</sup> Մ. Կ. Փափազեան, «Սերպերուն Դատը», *Հայաստանի Կոչնակ*, 1912, էջ 1123-1125:
- <sup>74</sup> Յակոբ-Գրիգոր, «Մուսա-Դաղ»ի Յաղթանակը Եուզոսլաւիոյ մէջ», *Արամագղ*, 18.03.1936:
- <sup>75</sup> Յակոբ-Գրիգոր, *Երկերու Հաւաքածոյ*, էջ 101:
- <sup>76</sup> Ե., «Հերոս Հայ Դեր-գնդապետ մը Քոյերայէ Մեռած», *Հորիզոն*, 22.09.1913:
- <sup>77</sup> «Հայ Գերիները Սերպիայի (sic) մէջ», *Արմենիա*, 18.12.1919:
- <sup>78</sup> «Հայ Գերիները Սերպիայում», *Արմենիա*, 31.03.1920:
- <sup>79</sup> «Պեկրատի Հայ Հիւպատոսը», *Արմենիա*, 22.09.1920, նաեւ՝ «Թող Օրինակ Ըլլա՞ր, Մարմարա», 22.05.1925:
- <sup>80</sup> «Հայերը Սերպիայի մէջ», *Վերջին Լուր*, 19.07.1919:
- <sup>81</sup> Richard G. Hovannisian, *The Republic of Armenia*, vol. III, University of California Press, 1996, էջ 399-400:
- <sup>82</sup> Հայաստանի Ազգային Արխիւ (ՀԱԱ), ՊՖՈՆՊ 200, ցուցակ 1, գործ 629:
- <sup>83</sup> ՀԱԱ, ՊՖՈՆՊ 430, ցուցակ 1, գործ 441:
- <sup>84</sup> Արշաւ, «Հրաշափառ Տեսարանը», *Երիտասարդ Հայաստան*, 22.06.1918:
- <sup>85</sup> 1977ին գրուած անստորագիր «Հայերը Հարաւսլաւիայում» յօդուածում, որ պահպանուում է Սփիւռքահայութեան Հետ Մշակութային Կապի Կոմիտէի Արխիւում («Հայերը Հարաւսլաւիայում», ՀԱԱ, ՖՈՆՊ 875, ցուցակ 16, գործ 125) նշուած է, թէ Սերբիան միակ երկիրն էր, որ Ա. աշխարհամարտից յետոյ իր դռները փակել է Հայ գաղթականների առաջ՝ պատճառաբանելով, թէ մեծ թուով (մօտ 40 հազար) ռուս գաղթականներ է ընդունել: Այս տեղեկութիւնը, ինչպէս տեսնում ենք, չի համապատասխանում իրականութեանը:
- <sup>86</sup> Այսպէս, 1922ի Յունուարի 2ին Էստոնիայի Ուլալք քաղաքի 30ամեայ բնակիչ, Խարկովի Համալսարանի շրջանաւարտ, ռազմական բժիշկ, ծնունդով շուշեցի Վառձապուհ Աթախանցը անգլերէն խնդրագիր է յղել Պօղոս Նուպարի ղեկավարած Հայ Ազգային Պատուիրակութեանը՝ յայտնելով, որ գտնուում է նիւթական նեղ վիճակում եւ փափագում է Բալկաններ տեղափոխուել եւ խնդրում է իրեն Հարաւսլաւիայի կամ Չեխոսլովակիայի մուտքի արտօնագիր տալ (ՀԱԱ, ՊՖՈՆՊ 430, ցուցակ 1, գործ 1411): Վառձապուհին յաջողուել է ուկրաինուհի կնոջ եւ զաւակի Հետ Հաստատուել Բելգրադում: 1991ին Հայաստանի ռազիոյին տուած Հարցազրոյցում նրա դուստրը՝ Միլիցա Աթախանցը, մանրամասն պատմել է հօր մասին, նշել, որ իր եւ եղբոր հայկական ինքնու-

Թեան պահպանման գործում մեծ դեր է ունեցել նաև ուկրաինուհի մայրը Ի դէպ, Վառաձապուհ Աթախանցի թոռնուհիներն են Բելգրադի օպերայի եւ բալետի թատրոնի պարուհիներ Աշխէն եւ Դանուսիա Աթախանցիները (Աշխէն Աթախանցի մասին տե՛ս՝ «Սերբահայ Պարուհին», Գարուն, 1999, թ. 1, էջ 89):

<sup>77</sup> Բարկէն Սիմոնեան, «Սողոմոն Թեհլիրեանի Որդին եւ Ուրիշները», Վերածնունդ Հայաստան, 1990, թ. 5, էջ 14:

<sup>78</sup> «Հայերը Հարաւսրաիայում»:

<sup>79</sup> «Հայ Ճարտարարուեստը Ի Սերպիայ», Արեւ, 5-11-1924:

<sup>80</sup> «Հայ Գորգագործներ Սերպիոյ մէջ», Արեւ, 17-12-1924:

<sup>81</sup> Քեմախցի մը, «Քեմախի Հայերը Սերպիոյ մէջ», Մարմարա, 13.03.1925:

<sup>82</sup> «Հայերը Հարաւսրաիայում»:

<sup>83</sup> Սիմոնեան, «Սողոմոն Թեհլիրեանի», էջ 15, նաև՝ «Խճանկար», Գարուն, 1999, թ. 1, էջ 88:

<sup>84</sup> «Եուկոսրաիոյ Հայերը», Հայրենիք, 5.08.1936: Ըստ «Հայերը Հարաւսրաիայում» յօդուածի՝ Հանգանակուել է 150 հազար դիմար, ինչը, թերեւս, չափազանցութիւն է:  
<sup>85</sup> «Պելլերատի Հայ Գաղութը», Արեւելք, 26.11.1933, նոյնը՝ "Armenians in Belgrade", Hairenik Weekly, 14.01.1934:

<sup>86</sup> Վ. Ս., «Երեսի վրայ Ձգուած Հայ Գաղութ մը», Յառաջ, 11-11-1933:

<sup>87</sup> «Եուկոսրաիոյ Հայ Միութիւնը», Հայրենիք, 17.03.1937:

<sup>88</sup> Հ. Գ. Մենեիշեան, «Հարաւային Սերպիոյ Հայ Գաղութը Փճացման Ենթակայ», Յառաջ, 7.02.1933:

<sup>89</sup> Այսօր յանրաւի մոռացուած Ստեփան Դաւիթեանը (ծն. 1830ին, Կեսարիայի Կերմիր գիւղում, մահացած 1890ին, Կեսարիայում, այլ տուեալով՝ Փարիզում) ժամանակի ամենահետաքրքրական Հայ անձնաւորութիւններից էր, բժիշկ եւ լեզուաբան: Նա լեզվաբանական Չամենհոֆի ստեղծած էսպերանտոյից առաջ Կ.Պոլսի կայսերական բժշկական դպրոցի դասախօսներին ներկայացրել է Համընդհանուր լեզուի իր գաղափարը: Այն հիմնել է գրարարի՝ որպէս կատարեալ լեզուի վրայ: 1887ին այդ մասին լոյս է ընծայել մի ֆրանսերէն ուսումնասիրութիւն՝ ներկայացնելով Փարիզի ակադեմիային: Նրա ֆրանսերէն աշխատութիւնները 1978ին վերահրատարակել է Յակոբ-Գրիգորը՝ իր առաջարկով (Ի դէպ, վերջինս Սկոպիէում ամուսնացել է Դաւիթեանի թոռնուհու՝ Հերմին Դաւիթեանի հետ): Նրա մասին մանրամասն տե՛ս՝ Յակոբ-Գրիգոր, Երկերու Հաւաքածոյ, էջ 201-217: Կարապետ Դաւիթեանի որդու՝ Տիգրանի կինը, Սկոպիէում ծնուած Հայուհի Արաքսի Դաւիթեանը հետեւեալն է պատմել սկեսրոջ մասին. «...արտակարգ ու ճանաչուած մարդ մըն էր, չքաւորներուն ձրի կը բուժէր, ատոր համար էլ Մակեդոնիոյ մէջ անոր շատ կը սիրէին: Դովտոր Կարապետի գաւակները Վենետիկ Մխիթարեաններու մօտ ուսանած են» (Սիմոնեան, «Սողոմոն Թեհլիրեանի», էջ 19): Ի դէպ, այս Կարապետ Դաւիթեանի թոռը՝ նոյնպէս Կարապետ Դաւիթեան (Garabet Tavitjan), մակեդոնական ջազային երաժշտութեան ճանաչուած դէմքերից է (յաճախ ելոյթներ է ունենում եղբայրների՝ Տիգրանի եւ Կարոյի հետ):

<sup>90</sup> Մենեիշեան, «Հարաւային Սերպիոյ», Յառաջ, 7.02.1933:

<sup>91</sup> «Զեւնարկ մը Սկիւպի մէջ», Հայրենիք, 27.05.1924:

<sup>92</sup> «Հայ Գաղթականութիւնը Մակեդոնիոյ մէջ», Մարմարա, 12.09.1925:

<sup>93</sup> «Հայ մը Սպաննուած Սարաջէվոյի մէջ», Հայրենիք, 9.02.1929:

<sup>94</sup> «Սերպիոյ Հանգանակութիւնը», Յառաջ, 12.02.1927:

- <sup>95</sup> Մեննելիշեան, «Հարաւային Սերպիոյ», 4.02.1933:
- <sup>96</sup> Նոյն:
- <sup>97</sup> Մեննելիշեան, «Հարաւային Սերպիոյ», 7.02.1933:
- <sup>98</sup> «Անհետացած Գաղութը»:
- <sup>99</sup> Յակոբ-Գրիգոր, «Ինչպէս կը Մեանինք», Հայաստանի Կոչնակ, 15.06.1935, էջ 589:
- <sup>100</sup> Յակոբ-Գրիգոր, «Սերպ Մամուլը եւ Հայերը»: Սակայն նոյն թուականին հրատարակուած իր մէկ այլ յօդուածում նոյն հեղինակը հարաւարաւահայութեան թիւը նշել է «մօտ հազար» (Յակոբ-Գրիգոր, «Ուրիշ Եուզոսլաւ Հրապարակագիր մ'ալ Հայերու մասին», Պաշար, 5.09.1935): 1935ին սփիւռքահայ մամուլում հրատարակուած հայերի թուաքանակի վերաբերեալ մի հաղորդագրութեան մէջ նշուած է, որ Հարաւարաւայութեան եւ Զեխոսլոյվալիայում բնակուած է ընդամէնը 600 հայ, ինչը աւելի հաւանական է («Արտասահմանի եւ Հայաստանի Հայերի Թիւը», Այբբ, 7.03.1935):
- <sup>101</sup> Այն, որ հայերը անծանօթ տարր չեն եղել Ի. դարի Ա. կէսի Հարաւարաւայութեան բնակիչների համար, կարող է վկայել թէկուզ հետեւեալ փաստը: Նորեւեան մրցանակի դափնեկիր սերբ գրող Իւօ Անդրիչը վկայել է, թէ ինչպէս 1933ին ձերբակալուել է գերմանացի նացիստների կողմից եւ մնացել մի նկուղում: Ֆաշիստ մի սպայ սկսել է ապտակել բանտարկեալներից մէկին, որն էլ փոխադարձել է ապտակները: Անդրիչը մտածել է, որ այդ խիզախ գերին անպայման հայ պէտք է լինի: Երկու օր անց այդ բանտարկեալը հրապարակաւ կացնահարուել է: Անդրիչն իմացել է, որ նա իսկապէս հայ է եղել (Գէորգ Տարօնի, «Գրականութեան Նոպէլեան Մրցանակակիր Իւօ Անդրիչ եւ Հայ Յեղափոխականը», Զահակիր, 27.02.1969): Հայերին ճանաչելու եւս մէկ փաստ է նոյն Անդրիչի «Սատանայի Պոչը» ստեղծագործութեան մէջ հայ հերոսների հանդէս գալը:
- <sup>102</sup> «Եուկո-Սլաւիո (sic) Հայերը», Լրաբեր, 18.04.1939:
- <sup>103</sup> Յակոբ-Գրիգոր, «Եուզոսլաւ Մամուլը Հայերու մասին», Արամազդ, 25.05.1935:
- <sup>104</sup> Յակոբ-Գրիգոր, «Սերպ Մամուլը եւ Հայերը», նաեւ՝ նոյն հեղինակի՝ «Եուկոսլաւ Հրապարակագիր մը Հայերու մասին», Ազատագր, 17.04.1935:
- <sup>105</sup> «Եուկո-Սլաւիոյ Հայերը», Արազ, 2.07.1936:
- <sup>106</sup> «Պուլկարիոյ Հայոց Առաջնորդարանին Հոգեւոր Պատուիրակը Եուկոսլաւիոյ մէջ», Նոր Լուր, 3.06.1936, նաեւ՝ «Հայերը Եուկո-Սլաւիալիոյ մէջ», Նոր լուր, 16.06.1936, նաեւ՝ թղթակից, «Փոխանորդ Հայր Սուրբին Սերպիա Այցելութիւնը», Փարոս, 16.06.1936, նաեւ՝ «Պուլկարիոյ Առաջն-Փոխանորդին Այցը Ի Եուկոսլաւիա», Պաշարեան Մամուլ, 19.06.1936, նաեւ՝ «Հայերը Եուկո-Սլաւիայի մէջ», Հայրենիք, 11.07.1936:
- <sup>107</sup> «Հայերը Եուկոսլաւիոյ մէջ», Հայաստանի Կոչնակ, 4.05.1940, էջ 429:
- <sup>108</sup> 1941ի տուեալով՝ Հարաւարաւայութեան հայերը զոհ չեն տուել եւ նրանց նիւթական վնասները եղել են աննշան («Սերպիոյ Հայերը Զոհ Տուած չեն», Հայաստանի Կոչնակ, 19.07.1941, էջ 715):
- <sup>109</sup> Յատկապէս յիշարժան են պարտիզանուհիներ Սիրվարդ Վարդապետեանի եւ Վարդուհի Սուքիասեանի անունները, երկուսն էլ ծնուած Բելգրադում: Մագումով քեմալիստ Սիրվարդ Վարդապետեանը (1924-1944) չորս անգամ ձեռնառումներ է նետել գերմանական կայանների վրայ, հինգերորդ անգամ, սակայն, բռնուել է եւ նացիստների կողմից հրապարակաւ սօրէն կացնահարուել Մլադընովաց քաղաքի հրապարակում, ռազմագերիների ներկայութեամբ: 1967ի Հոկտեմբերի 22ին նրա նահատակման վայրում կանգնեցուել է նրա յուշարձանը (Գէորգ Տարօնի, «Հանդիսաւոր Զօրավար Վլադիսլաւ Ռադովիչի Ղեկավարութեամբ Բացում՝ Հայ Փարթիզանուհի Սիրվարդ

- Վարդապետեանի Յուշարձանին», *Ջահակիր*, 28.11.1974): Նրա եղբայրը՝ Միողբազ Վարդապետեանը, յետագայում Հարաւսլաւիայում յայտնի է դարձել որպէս երգահան: Վարդուհի Սուքիասեանի (1923-1968) ծածկանունը եղել է Ռուսիցա: Բ. Աշխարհամարտի ժամանակ թողել է ուսումը Բելգրադի Առեւտրի Ակադեմիայում եւ մտել պարտիզանական ջոկատ: Որոշ ժամանակ ղեկավարել է Բելգրադի ընդլատակեայ պայքարը, աչքի ընկել սխրագործութիւններով: Ընկնելով Գետապոլի ձեռքը՝ Ռուսիցան դատապարտուել է մահապատժի, սակայն ընկերները նրան ազատել են: Պարզեւատրուել է շքանշաններով: Հարաւսլաւական դիմադրութեան շարժմանը մասնակցել են նաեւ նրա քոյրերը՝ Թագուհի եւ Մարգարիտ Սուքիասեանները:
- <sup>110</sup> Յակոբ-Գրիգոր, *Երկերու Հաւաքածոյ*, էջ 101:
- <sup>111</sup> Արծուի Բախչինեան, *Հայագգի Գործիչներ- Հնագոյն ժամանակներից մինչեւ մեր Օրերը*, Երևան, «Չանգակ-97», 2002, էջ 125-126:
- <sup>112</sup> Totomianz, *Le Rôle*, էջ 3:
- <sup>113</sup> Hagop-Krikor, էջ 107: Այստեղ Յակոբ-Գրիգորը Պաշիչի անունը սխալմամբ գրել է Ստեփան:
- <sup>114</sup> Հայաստանի Գրականութեան եւ Արուեստի Պետական Թանգարան, Վահան Մալէգեանի ֆոնդ, թիւ 722:
- <sup>115</sup> Զ. Սուրէնեան, «Իմ Սերունդս (Սնդրանք մը Պ. Յակոբ-Գրիգորէ)», *Արամազդ*, 24.04.1936:
- <sup>116</sup> «Հայուհի մը Դքսուհի», *Հայրենիք*, 11.04.1933:
- <sup>117</sup> *Յառաջ*, 12.01.1927:
- <sup>118</sup> Յակոբ-Գրիգոր, «Հայ Պաշտօնեայ մը՝ Եուկօսլաւ Բանակի մէջ», *Հայաստանի կոչեակ*, 2.02.1935, էջ 110-111:
- <sup>119</sup> «Սերմեր Օտար Հողի վրայ», *Հայրենիք*, 25.05.1934: Դաւիդովիչը եղել է տիպիկ ուժացած հայ. Ինչպէս վկայել է Տոտոմեանցը, «Ասկէ տարի մը առաջ... Եուկօսլաւիա այցելութեանս առթիւ, Պելկրատի մէջ հանդիպեցայ իմ բարեկամ հայագգի պ. Դաւիթովիչի, որ Եուկօսլաւիոյ արհեստաւորներու քօօփերաթիւներու միութեան քարտուղարն է եւ սերպ տնտեսական թերթի մը խմբագիրը: Պ. Դաւիթովիչ ինձ յայտնեց, որ դեռ ժընեւ ուսանող եղած առեւն, «Լառուս» բառարանին մէջ կարդացեր է հայերու մասին «խորամանկ, ժլատ, փերեզակ» որակումները, ամչցած է իր հայ ըլլալու համար եւ նախընտրած է սերպ դառնալ» («Տեսակցութիւն Փրոֆ. Վ. Տոտոմեանցի հետ», *Հայրենիք*, 25.11.1936):
- <sup>120</sup> «Ոսկեայ Պատուանշան Փրոֆ. Տոտոմեանցի», *Յուսարեր*, 14.01.1935:
- <sup>121</sup> «Փրոֆ. Տոտոմեանց կը Հաստատուի Պելկրատ», *Հայրենիք*, 2.11.1937:
- <sup>122</sup> *Russkoe Zarubeje: Zolotaya Kniga Russkoy Emigratsii. Pervaya Tret' XX Veka. Entsiklopedicheskiy Biograficheskiy Slovar' (Ռուսական արտերկիր. տարագրութեան ոսկէ գիրքը, Ի. դարի առաջին եռամսեակ, հանրագիտակ կենսագրական բառարան)*, Մոսկուա, ՌՕՍՍՊէՆ, 1997, էջ 668:
- <sup>123</sup> Նոյն, էջ 280, նաեւ՝ Գէորգ Եղիազարեան, «Ռուանդ Մակարեան, Երգարուեստի Պայծառ Նուիրեալը», *Արուեստ*, 1991, թ. 7, էջ 47:
- <sup>124</sup> Յակոբ-Գրիգոր, *Երկերու Հաւաքածոյ*, էջ 28:
- <sup>125</sup> Ե. Գ., «Հայ Ուսանողի մը Յաջողութիւնը Չարէպի մէջ», *Յառաջ*, 31.03.1931:
- <sup>126</sup> Յակոբ-Գրիգոր, *Երկերու Հաւաքածոյ*, էջ 102:
- <sup>127</sup> «Մարաջախտ Թիթօ Ընդունեց Տիգրան պէյ Զրաճեանը», *Պայքար*, 5.06.1955:

- <sup>128</sup> Բրուտեան, էջ 70-73.
- <sup>129</sup> Արտակ Մաղաչեան, «Մոռացուած էջեր (Սողոմոն Թեհլիրեանի կեանքից)», *Դրօշակ*, 2004, թ. 4, Հոկտեմբեր-Դեկտեմբեր, էջ 75-79:
- <sup>130</sup> Սզակիր մը, «Մերանի Խորասանճեան, Մենալ ժանիթովիջ (Սերպուհի)», *Մարմարա*, 11.01.1925: Ի դէպ, նման մի գործչուհի էլ եղել է ԱՄՆում՝ ազգութեամբ հորվաթուհի Իրմա Պոյաճեանը (1902-1986), Հանրային գործիչ Վահան Պոյաճեանի կինը, որ մօտիկից կապուած է եղել ամերիկահայ կազմակերպութիւններին, իմացել Հայերէն գրել եւ կարգար:
- <sup>131</sup> «Սերպ Գրականութիւն. կեանքին Ընդմէջէն, Պօր. Միրքովիջ», *Ազատամարտ Գրական Յանձնարար*, 20.03.-2.04.1911, էջ 571:
- <sup>132</sup> Յովհաննէս Թումանեան, *Երկերի Լրակատար ժողովածու 10 Հատորով*, Հտր. 4, Երեւան, Հայաստանի ԳԱ Հրատարակչութիւն, 1991, էջ 611:
- <sup>133</sup> Նոյն, էջ 612:
- <sup>134</sup> Յովհաննէս Թումանեան, *Երկերի ժողովածու 4 Հատորով*, Հտր. 4, Երեւան, Հայաստանի ԳԱ Հրատարակչութիւն, 1969, էջ 272-275:
- <sup>135</sup> Աւետիք Իսահակեան, *Երկերի ժողովածու*, Հտր. 2, Երեւան, «Հայաստան», 1974, էջ 221-224:
- <sup>136</sup> Ռուբէն Սեւակ, *Անտիպ էջեր*, Երեւան, 1995, «Նաիրի», էջ 28-29:
- <sup>137</sup> Բեթար Քոչիշ, «Եապլան (պատմուածք)», *Նաւասարդ*, 1924, Ա. Հատոր, էջ 249-250: Իւլան Քրասքօ, «Vesper Dominicae. Եաւզէ (պատմուածքներ)», *Նոյն*, էջ 250-251: «Սերպ ժողովրդական Երգեր. Ո՛վ Դրաւ Խնձորը Մոցիս մէջ, Աղջիկները Ի՞նչ Կ'երագեն», *Ծառաջ*, 4.03.1928, եւն.:
- <sup>138</sup> Յակոբ-Գրիգոր, «Սերբ Ազգային Դիւցազներգութիւն», *Արեւ*, 12-12.1938, նաեւ՝ *Յակոբ-Գրիգոր, Երկերու Հաւաքածոյ*, էջ 306-315:
- <sup>139</sup> Յակոբ-Գրիգոր, «Ուրիշ Եուզոսյաւ Հրապարակագիր»:
- <sup>140</sup> Յակոբ-Գրիգոր, «Հայութիւնը Ճանչցնելու Համար. Մուսա-Դաղը ու Պեպոյ», *Պայքար*, 25.01.1936:
- <sup>141</sup> Յակոբ-Գրիգոր, «Մուսա-Դաղ»ի Յաղթանակը»:
- <sup>142</sup> Յակոբ Մանուկեան, *Քեմանչիստ Թուրքնի Յուշերը*, «Հայ Տիպ Քոմիւնիկրաֆ-Թեքնոփրէս», Պէյրութ, 1989, էջ 44-45:
- <sup>143</sup> Սուրէն, «Սերպահայ կեանքէն», նաեւ՝ «Հայ Երգը Պելլրատի մէջ», *Նաւասարդ*, 1925, Բ. տարի, Բ. պրակ, էջ 64:
- <sup>144</sup> «Հայկական Երեկոյթ մը Սերպիոյ մէջ», *Հայրենիք*, 21.05.1925:
- <sup>145</sup> Վանէ Սանիա, «Հայերը Սերպիոյ մէջ. Պ. Եղիազարեանի Նուագահանդէսը», *Մարմարա*, 26.02.1925:
- <sup>146</sup> Յակոբ-Գրիգոր, «Կոմիտաս Վրդ. Եուզոսյաւիոյ մէջ (Յարութիւն Սիւրմէեանի Երգահանդէսը)», *Ապագայ*, 15.02.1936:
- <sup>147</sup> «Արթուր Սիւրմէեան Եուզոսյաւ Օփերայի Առաջնակարգ Երգիչ», *Հայաստանի Կոչնակ*, 24.07.1954, էջ 714, նաեւ՝ Սիմոնեան, «Սողոմոն Թեհլիրեանի», էջ 20: Ի դէպ, Յարութիւն Սիւրմէեանի որդին՝ Ղազարոս Սիւրմէեանը, եղել է կանադական բալէտի ճանաչուած բնութագրական պարողներից:
- <sup>148</sup> Հարաւորաբար Հայ երգահանների մասին տե՛ս՝ Բրուտեանի Հատորում, էջ 70-73:
- <sup>149</sup> Վահրամ Փափազեան, *Երկեր Հինգ Հատորով*, Հտր. 1, Երեւան, «Մովսէսական Գրող» Հրատարակչութիւն, 1979, էջ 306:

<sup>150</sup> Վահրամ Փափազեան, *Նրկեր Հինգ Հատորով, Հտր. 2, Երևան, «Սովետական Գրող»* Հրատարակչություն, 1981, էջ 461:

<sup>151</sup> Յակոբ-Գրիգոր, «Հայութիւնը Ճանչցնելու համար»:

<sup>152</sup> Որպէս ազատաց յիշենք 1956ի մի վկայութիւն սփյուռքահայ մամուլից: Յիշուել է, որ Հարաւայաւիայի Վունց քաղաքում ապրում է 7-8 հայ ընտանիք, որոնք նախապէս եղել են երկրագործներ, իսկ ներկայումս խանութների գործակատարներ եւ արհեստաւորներ են: «Այս փոքր գաղութը հեզտիտ է կ'այլասերի, օտարներու հետ ամուսնութեամբ: Գաղութի հին անդամները ցատով դիտել կու տան, թէ ցարդ ոչ մէկ հոգեւոր հովիւ այցելած է իրենց» («Հայ Ազգային կեանք», Հայաստանի կոչնակ, 28.04.1956, էջ 405):

## FROM THE HISTORY OF ARMENIAN-YUGOSLAV RELATIONS

(From the beginning to the 1930s)

(Summary)

ARTSVI BAKHCHINYAN

The article is a compilation of data and information about the few circumstantial contacts and links the Armenians had with the countries and peoples of ex-Yugoslavia throughout the centuries.

The Armenian presence in the territory of ex-Yugoslavia dates back to the 10<sup>th</sup> century, when Armenian followers of the Paulician movement settled in the area. The oldest Armenian inscriptions in the area date back to 1202 and 1218, both inscribed on Serb churches. In 1392 the Armenian church of Jermenchich was built in Serbia, while various Armenian merchants and craftsmen had settled in the diverse cities of Yugoslavia during the Ottoman rule, especially in Beograd, which has been mentioned in several Armenian manuscripts and literature. An Armenian church and school were established in Novi Sad in 1746. They functioned until the late-1930s and were destroyed in 1964 by the Communist regime.

There were some cultural relations too. Both the first Serbo-Croatian dictionary and the Serbian ABC book were published in the printing house of the Armenian Mekhitarist congregation in Vienna.

After the Armenian Genocide of 1915-1922 many Armenians took refuge in various cities of Yugoslavia. In 1932 the Armenian Union of Beograd was founded. In 1935 there were about 500 Armenians in Yugoslavia, mainly in Beograd and Skopje. These were mostly traders, craftsmen, and physicians; some were intellectuals and artists. Their tiny number and lack of organization led to their assimilation in the Yugoslav community in the 1930s. Nonetheless most of the heirs of the assimilated Armenians try to maintain their national identity.